

子守貞守廉守慶守道並同貶。又詔毛仲及永州殺之。舊唐書

李正己

李正己高麗人。本名懷玉。生於平盧。乾元三年。平盧節度使王玄志卒。懷玉遂殺玄志子。共推侯希逸為軍師。希逸母即懷玉姑也。後與希逸同至青州。希逸用為兵馬使。正己沉毅得眾心。會軍人逐希逸。遂立正己為帥。朝廷因授平盧淄青節度觀察使。海運押新羅渤海兩蕃使。檢校工部尚書。青州刺史。賜今名。尋加左僕射。封饒賜郡王。大曆十三年。請入屬籍。從之。大曆中薛嵩死。諸道共攻之。正己得曹濮徐兗鄆共十三州。內視同列。貨市渤海名馬。歲歲不絕。法令齊一。賦稅均輕。最稱强大。建中二年。正己卒。子納摠父眾。乃效順。詔加平盧軍節度青淄等州觀察使。貞元八年。納死軍中。朝廷因授其子師古右金吾大將軍同正。平盧及青淄齊節度使。營田觀察。海運陸運押新羅渤海兩蕃使。師古卒。其異母弟師道請命。元和元年十月。授師道檢校工部尚書。充平盧軍及淄青節度營田觀察海

運押新羅渤海兩蕃等使。全上

王思禮

王思禮營州城傍高麗人也。父虔威為朔方軍將。以習戰聞。思禮少習戎旅。隨節度使王忠嗣至河西。與哥舒翰對為押衙。及翰為隴右節度使。思禮與中郎將周佖為翰押衙。以功除右金吾衛將軍。充關西兵馬使。至德二年。思禮與廣平王收西京。領兵先入清宮。又從郭子儀收東京。遷戶部尚書。封霍國公。食實封三百戶。乾元中加司空。上元二年四月薨。贈太尉。諡武烈。思禮長於支計。短於用兵。然立法嚴整。士卒不敢犯。時議稱之。同上

右高句麗

王仁附阿直岐

王仁百濟國人。本漢高帝之末孫也。高帝之後有曰鸞。鸞之後有曰王狗。狗之孫為仁。仁通于諸典。又能察人相。應神天皇十五年。百濟久素王按仇遣阿直岐者來。時阿直岐能讀經典。皇子菟道稚郎子師之。天皇問



有勝汝之博士耶。對曰有王仁者勝於我。帝遣使於百濟徵王仁。翌年二月。仁持千字文來朝。以孝經論語授皇子菟道雅郎子。皇子以為師。習諸典籍莫不通達。於是儒教始行於本朝。仁且詠難波津歌。祝仁德寶祚。謂之歌父。仁死合祭牛頭天皇。書首等始祖也。和漢三才圖書

百濟王仁來。大闡儒風。仁其先漢人也。崔豹古今注。所謂千乘王仁者耶。和泉國百舌鳥野北陵。反倭皇陵東池上。即楯井池其地有王仁祠。應神之子

菟道雅郎子。嘗師仁學。其後受禪。讓於兄大鷦鷯尊。兄弟有夷齊之行。郎子薨。尊悲哀不已。仁乃獻和歌方勸即位。於是尊即位。此本朝之美事也。必仁之教導所使乎。亦可觀百濟有人矣。然三韓人寥寥無聞。雖美事不知如此。異稱日本傳

松下見林曰鴻書日本之學始於徐福。余按日本之學。蓋自徐福有之。非以福為始也。唯正學之不失傳功。被於萬世者王仁也。應神之朝。王仁以漢帝之苗裔來。為仁德天皇菟道皇子師。弘聖賢之道。為當世之

儒宗。恨不令劉仲達知之。○又曰武備志。日本譯語多訛。華人不通和語也。昔王仁自百濟來于我國。能通和語訓導國人。誠非後世之所及也。並同上

物部茂卿曰不佞嘗論說先正夫子。有大功德於斯文者而言曰昔在邃古。吾東方之國泯泯乎罔知覺。有王仁氏而後民始識字。有黃備氏而後經藝始傳。有管原氏而後文史可誦。有惺窩氏而後人人言則稱天語聖。斯四君子者。雖世尸祝乎學宮可也。日本徠集

藤益根曰夫王仁之讀經史也。必傳魏晉之音。以之將於太子也。不用俗語答韓語。以倒置其讀明矣。爾後往往人熟其音。奕世二十歷歲四百。其間唯其傳業者。東西兩史氏世奉其職。以備其員而已。孝經本例

案百濟人物之見於日本書籍者若干人。而並無事實之可著。且悉於交聘志。通日本條故此不贅錄。至於王仁。則創學於日本為彼儒宗。故特為備載。



餘紀 餘昆 餘暈 餘都 餘又 沐衿 餘爵 餘流 糜貴  
于西 餘婁

世祖大明二年。百濟王慶遣使上表曰。臣國累葉偏受殊恩。文武良輔。世蒙朝爵。行冠軍將軍右賢王餘紀等十一人。忠勤宜在顯進。伏願垂愍。並聽賜除。仍以行冠軍將軍右賢王餘紀為冠軍將軍。以行征虜將軍左賢王餘昆行征虜將軍。餘暈並為征虜將軍。以行輔國將軍餘都。餘又並為輔國將軍。以行龍驤將軍沐衿。餘爵並為龍驤將軍。以行寧朔將軍餘流。糜貴並為寧朔將軍。以行建武將軍于西。餘婁並為建武將軍。宋書

姐瑾 餘古 餘歷 餘固 高達 楊茂 會邁

武帝永明八年。百濟王牟大上表曰。原本缺報功勞。勤實存名烈。假行寧朔將軍。臣姐瑾等四人。振竭忠効。攘除國難。志勇果毅等威名將。可謂扞城固蕃社稷。論功料勤。宜在甄顯。今依例輒假行職。伏願思愍。聽除。所假寧朔將軍。面中王姐瑾。歷贊時務。武功並列。今假行冠軍將軍都漢王。建

威將軍。八中侯將軍。餘古。弱冠以輔佐。忠効夙著。今假行寧朔將軍。阿錯王。建威將軍。餘歷。忠欵有素。文武列顯。今假行龍驤將軍。邁。盧王。廣武將軍。餘固。忠効時務。光宣國政。今假行建威將軍。弗斯侯。牟大。又表曰。臣所遣行建威將軍。廣陽太守兼長史。臣高達。行建威將軍。朝鮮太守兼司馬。臣楊茂。行宣威將軍。兼參軍。臣會邁等三人。志行清亮。忠欵夙著。往入始中。比使宋朝。今任臣使。冒涉波險。尋其至効。宜在進爵。謹依先例。各假行職。且玄澤靈休。萬里所企。况親趾天庭。乃不蒙賴。伏願天監。特愍除正。達邊効夙著。勤勞公務。今假行龍驤將軍。帶方太守。茂。志行清靈。公務不廢。今假行建威將軍。廣陵太守。邁。執志周密。屢致勤効。今假行廣武將軍。清河太守。詔可。並賜軍號。除太守。南齊書○案原本缺年條。無考。然據下文。庚午年。則此為永明八年也。

沙法名 贊首流 解禮昆 木干那 慕遺 王茂 張塞 陳明

是歲案永明八年也。魏虜發騎數十萬。攻百濟。入其界。牟大遣沙法名。贊首流。解



禮昆。木干那。率衆襲擊虜軍大破之。建武二年。牟大遣使上表曰。臣自受昔封世被朝榮。忝荷節鉞。剋攘列辟。王姐瑾等。並蒙光除。臣庶咸泰。去庚午年。獫狁弗悛。舉兵深逼。臣遣沙法名等。領軍逐討。宵襲霆擊。凶梨張惶。崩若海蕩。乘奔追斬。僵尸丹野。由是摧其銳氣。鯨暴韜凶。今邦宇謐靜。實名等之略。尋其功勳。宜在褒顯。今假沙法名。行征虜將軍。邁羅王。贊首流。爲行安國將軍。辟中王。解禮昆。爲行武威將軍。弗中侯。木干那。前有軍功。又拔臺舫。爲行廣威將軍。面中侯。伏願天恩。特愍聽除。又表曰。臣所遣行龍驤將軍。樂浪太守。兼長史。臣慕遺。行建武將軍。城陽太守。兼司馬。臣王茂。兼參軍。行振武將軍。朝鮮太守。臣張塞。行揚武將軍。陳明。在官忘私。唯公是務。見危授命。蹈難弗顧。今任臣使。冒涉波險。盡其至誠。實宜進爵。各假行署。伏願聖朝。特賜除正。詔可。並賜軍號。上全

黑齒常之附沙吒相如

黑齒常之。百濟西部人。長七尺餘。饒毅有謀畧。爲百濟達率。兼風達郡將。

猶唐刺史云。蘇定方平百濟。常之以所部降。而定方囚老王。縱兵大掠。常之懼。與左右酋長十餘人。遯去。嘯合逋亡。依存山自固。不旬日歸者三萬。定方勒兵攻之。不克。常之遂復二百餘城。龍朔中。高宗遣使招諭。乃詣劉仁軌降。累遷左領軍員外將軍。洋州刺史。儀鳳三年。從李敬玄。劉審禮。擊吐蕃。審禮敗。敬玄欲引還。阻泥溝。兵不得出。賊屯高壓官。常之夜率敢死士五百人。掩其營。殺掠數百人。賊酋跋地。設棄軍走。帝歎其才。擢左武衛將軍。檢校左羽林軍。賜金帛殊等。進爲河源軍副使。調露中。吐蕃使贊波等入寇。屯良非川。李敬玄之敗。常之引精騎三千。夜襲其軍。斬首二千級。獲羊馬數萬。贊波等單騎去。卽拜河源道經略大使。因建言。河源當賊衝。宜增兵鎮守。而運饌須廣。乃斥地置烽七十所。墾田五千頃。歲收粟斛百餘萬。由是食衍士精。戍邏有備。永隆二年。贊波營青海。常之馳掩其屯。破之。悉燒糧廩。獲羊馬甲首不貲。詔書勞賜。凡泄軍七年。吐蕃憚畏。不敢盜邊。封燕國公。垂拱中。突厥復犯塞。常之率兵追擊。至兩井。忽與賊遇。賊



騎三千方擐甲。常之見其囂以二百騎突之。賊皆棄甲去。暮賊大至。常之潛使人伐木。列炬營中。若烽燧然。會風起。賊疑救至。遂夜遯。久之為燕然道大總管。與李多祚王九言等擊突厥骨咄祿元珍。放黃花堆破之。追奔四十里。賊潰歸磧北。會左監開衛郎將饜寶璧欲窮追要功。詔與之常之共計。寶璧獨進。為虜所覆。舉軍沒。寶璧下吏誅。常之坐無功。會周興等誣其與右鷹揚將軍趙懷節反。捕繫詔獄。投繯死。常之御下有恩。所乘馬為士所箠。或請罪之。答曰。何遽以私馬鞭官兵乎。前賞賜。分麾下無留貲。及死人皆哀其枉。新唐書○唐書本傳全錄

始蘇定方破百濟。酋頗沙吒相如黑齒常之。嘯亡散據險。以應福信。至是皆降。劉仁軌以赤心示之。卑取任存自効。即給鎧仗糧糒。仁師曰。夷狄野心難信。若授甲濟粟。資寇便也。仁軌曰。吾觀相如常之。忠而謀。因機立功。尚何疑。全上○詳見世紀

右百濟

金生

新羅國金生者。唐德宗時人也。父母微。不知世系。自幼能書。平生不攻他藝。好佛。隱居不仕。年踰八十。猶操筆不休。隸行草皆入神。學者傳寶之。後高麗學士洪灌入宋。以金生行草一卷示之。笑曰。天下除右軍。焉有妙筆如此哉。洪灌屢辨之。終不信。和漢三才圖書

按此三國史。金生本傳文也。本傳云。金生生於景雲三年。崇寧中。洪灌隨進奉使入汴。遇翰林待詔楊球李革。示金生行草。二人亟稱之。云爾。新羅時。又有姚克一。官至侍書學士。筆力遒勁。得歐陽率吏法。亦奇品也。

金思蘭

唐玄宗開元二十一年正月庚申。命太僕卿員外賓同正員金思蘭使于新羅。思蘭本新羅之行人。恭而有禮。因留宿衛。及是委以出疆之任。且使之也。冊府元龜



金忠信

開元二十二年二月。新羅王興光按聖德王從弟左領軍衛員外將軍忠信。上表言臣本國王。以臣久侍天庭。遣從姪志廉代臣。臣即合還。伏望因臣還國。以副使假臣執節本國。討除靺鞨。獻捷丹圍。效毛髮之功。答雨露之私。帝許焉。同上

金沔

元和七年七月庚午。以新羅質子試衛尉少卿賜紫金魚袋金沔。為試光祿少卿。充吊祭册立副使。隨崔稜赴新羅。全上○案全唐詩有陶翰送金卿歸新羅詩

金士信

元和十五年二月。新羅質子試太子中允賜紫金魚袋金士信奏。臣本國朝天二百餘載。嘗差質子宿衛闕庭。每有天使臨蕃。即充副使。轉通聖旨。下告國中。今在城宿衛質子。臣次當之。同上

金忠義

新羅人金忠義。以工巧幸。擢少府監。蔭子補齋郎。韋貫之不與曰。是將奉郊廟祠祭。階為守宰者。安可以賤工子為之。又劾忠義不宜污朝籍。忠義竟罷。新唐書

金忠義德宗朝將軍。巧絕過人。學畫迹精妙。歷代名畫記

金雲卿

唐敬宗初即位。雞林人前右監門衛率府兵曹叅軍金雲卿。進狀請充入本國宣慰副使。從之。武宗會昌元年七月。勅歸國新羅官。前入新羅宣慰副使。前充兗州都督府司馬。賜緋魚袋。金雲卿。可淄州長史。冊府元龜

張保臯 鄭年

張保臯鄭年者新羅人。自其國來徐州。為軍中小將。保臯年三十。鄭年少十歲。兄呼保臯。俱善鬪戰。騎而揮槍。其本國與徐州。無有能敵者。年復能沒海。履其地五十里不噎。角其勇健。保臯差不及年。保臯以齒年以藝。常



齟齬不相下。後保臯歸新羅。謁其王曰：遍中國以新羅人爲奴婢。願得鎮  
 清海。新羅海路之要使賊不得掠人西去。其王與萬人如其請。自大和後。海上舞  
 鬻新羅人者。保臯既饗於其國。年錯寔去職。饑寒在泗之漣水縣。一日言  
 於漣水戍將馮元規曰：年欲東歸乞食於張保臯。元規曰：爾與保臯所挾  
 何如。奈何去死其手。年曰：饑寒死不如兵死快。况死故鄉耶。年遂去。至謁  
 保臯。保臯飲之極歡。飲未卒。其國使至。大臣殺其王。國亂無主。保臯遂分  
 兵五千人與年。持年泣曰：非子不能平禍難。年至其國。誅反者立王以報。  
 王遂徵保臯爲相。以年代保臯。文苑英華

杜牧贊曰：天寶末。安祿山亂。朔方節度使安思順。以祿山從弟賜死。詔  
 郭汾陽代之。後旬日。復詔李臨淮。持節分朔方半兵。東去趙魏。當思順  
 時。汾陽臨淮俱爲牙門都將。二人不相能。雖同盤飲食。常睨相視。不交  
 一言。及汾陽代思順。臨淮欲去計未決。新唐書有詔至汾陽。兵東討。唐書  
作詔臨淮分汾陽半兵東出趙魏。臨淮入請曰：一死固甘。乞免妻子。汾陽趨下。持手上

堂偶坐曰：今國亂主遷。非公不敢東討。豈懷私忿時耶。悉召軍吏出詔  
 書讀之。如詔約束。及別執手泣涕。相勉以忠義。訖平劇盜。實二公之力。  
 知其心不畔。知其材可任。然後心不疑。兵可分。平生積忿。知其心難也。  
 忿必見端。知其材益難也。此保臯與汾陽之賢等耳。年投保臯。必曰：彼  
 貴我賤。我降下之。不宜以舊忿殺我。保臯果不殺。此亦人之常情也。臨  
 淮分兵。詔至。請死於汾陽。此亦人之常情也。保臯任年事出於己。年且  
 饑寒易爲感動。汾陽臨淮平生抗立。臨淮之命出於天子。角集作於保  
 臯。汾陽爲優。此乃聖賢遲疑成敗之際也。彼無它也。仁義之心與雜性  
集作情。並植。雜性勝則仁義滅。仁義勝則雜性鎖。彼二人仁義之心既勝。  
 復資之以明。故卒成功。世稱周召爲百代人師。周公擁孺子而召公疑  
 之。以周公之聖。召公之賢。少事文王老佐武王。能平天下。周公之心召  
 公且不知之。苟有仁義之心。不資以明。雖召公尙爾。况其下哉。語曰：國  
 有一人其國不失。夫亡國非無人也。其未亡時。賢人不用。苟能用之一



人足矣。上全

宋祁贊曰嗟呼不以怨毒相恭。而先國家之憂。晉有祁奚。唐有汾陽。保  
皐孰謂夷無人哉。新唐書

按新羅史。保皐一名弓福。興德王三年四月。為清海大使。至僖康王  
三年。金明弒王篡立。時神武主避亂在清海。保皐遂分兵與鄭年。以  
平國難。立神武王。王既即位。以保皐為感義軍使。食邑二千戶。文聖  
王十三年。罷清海鎮。且無以保皐為相。及以年代守清海事。此與唐  
書有異。

金允夫

唐敬宗寶歷元年五月。新羅王金彥昇奏。其新赴金允夫等一十二人。請  
留在宿衛。仍令配國子監習業。鴻臚寺給資糧。從之。二年十二月。允夫請  
準例充入蕃副使。不許。但隨告使充副使。文宗開成元年十二月壬子。新  
羅質子試光祿卿。賜紫金魚袋。金允夫進狀稱。本國王命臣入朝充質。二

十六年殮矣。三蒙改授試官。再當本國宣慰及册立等副使。准往例皆蒙  
特授正官。遂授武成王廟令。册府元龜

金可記。全唐詩記作紀

金可記新羅人也。賓貢進士。性沉靜好道。不尚華侈。或服氣鍊形。自以為  
樂。博學強記。屬文清麗。美婆容。舉動言談。迥有中華之風。俄擢第。於終南  
山子午谷葺居。懷隱逸之趣。手植奇花異果。極多。常焚香靜坐。若有思念。  
又誦道德及諸仙經。不輟。後三年。思歸本國航海而去。復來衣道服。却入  
終南務行陰德。人有所求。初無阻拒。精勤為事。人不可偕也。唐大中十二  
年十二月。忽上表言。臣奉玉皇詔。為英文臺侍郎。胡應麟筆叢金可記  
英文臺侍郎見仙傳拾  
遺。明年二月二十五日。當上昇。時宣宗極以為異。遣中使徵入內。固辭不  
就。又求玉皇詔辭。以為別仙所掌。不留人間。遂賜宮女四人。香藥金綵。又  
遣中使二人。專伏侍者。可記獨居靜室。宮女中使多不接近。每夜聞室內  
常有客談笑聲。中使窺竊之。但見仙官仙女各坐龍鳳之上。儼然相對。復



有侍衛非少。而宮女中使不敢輒驚。二月二十五日。春景妍媚。花卉爛熳。果有五雲唳鶴。翔鸞白鵠。笙簫金石。羽蓋瓊輪。幡幢滿空。仙仗極衆。昇天而去。朝列士庶觀者。填隘山谷。莫不瞻禮歎異。太平廣記○續神仙傳飛人也○案全唐詩有章孝標送金可記歸新羅詩

崔致遠

崔致遠。高麗人。按當作新羅人貢賓及第。高駢淮南從事。新唐書

崔致遠。新羅人。唐時許其國士子。就試賢科。致遠與崔匡裕二人。游學中華。接踵成進士。廣輿記

雙女墳記。雞林人崔致遠。唐乾符中。補溧水尉。嘗憇于招賢館。前岡有塚。號曰雙女墳。詢其事跡。莫有知者。因爲詩以吊之。是夜感二女至。稱謝曰。兒本宣城郡開化縣馬陽鄉張氏二女。少親筆硯。長負才情。不意爲父母匹于醯商小豎。以此憤恚而終。天寶六年。同葬于此。宴語至曉而別。在溧水縣南一百一十里。六朝事跡

按崔致遠字孤雲。王京沙梁部人。年十二。隨海舶入唐。乾符元年甲午。禮部侍郎裴瓚榜下及第。爲侍御史內供奉。時黃巢叛。高駢辟爲從事。檄黃巢文出於孤雲。始西游時。與羅隱及同年顧雲友善。光啓元年。奉詔歸本國。雲以詩送之。畧曰。我聞海上三金鼈。金鼈頭戴山高高。山之上兮。珠宮貝闕黃金殿。山之下兮。千里萬里之洪濤。傍邊一點雞林碧。鰲山孕秀生奇特。十二乘船渡海來。文章感動中華國。十八橫行戰詞苑。一箭射破金門策。此詩載三國史本傳。而全唐詩見漏。又東文選。崔文昌和張進士喬村居見寄詩注云。喬字松年。而全唐詩小傳不著。喬字孤雲。後帶家隱伽椰山。以終老。高麗顯宗時。贈內史令文昌侯。從祀文廟。有集三十卷。行於世。

王巨仁

王巨仁。新羅國隱士。朝鮮史畧云。新羅女主曼。案新羅真聖王也與魏弘通。弘死復引年少美丈夫私之。授以要職。由是佞倖肆志。紀綱壞弛。時有人譏謗。



時政榜於路。主疑巨仁所爲。命下獄將誅之。巨仁憤怨作詩。詩見藝文志書獄壁。是夕忽震雷雨雹。主懼釋之。唐僖宗文德初年事也。全唐詩

金岳

後唐同光二年四月戊寅。新羅朝貢使。授倉部侍郎。賜紫金魚袋。金岳爲朝議大夫。試衛尉卿。冊府元龜

王逢規 張希巖 李彥模 張芬 朴術洪 李忠式

明宗天成二年四月乙卯。以新羅國權知康州事王逢規。案逢規同光二年以泉州節度使遣使爲懷化將軍。新羅國前登州都督府長張希巖。新羅國登州知後官。本國金州司馬李彥模。並可簡較右散騎常侍。庚午以前。新羅國入朝使中散大夫兵部侍郎。賜紫金魚袋張芬。可檢校工部尙書部使。兵部郎中。賜緋魚袋朴術洪。可兼御史中丞。判官倉部員外郎。賜緋魚袋李忠式。可兼侍御史。同上

案新羅人之見於中國書籍者不可殫記。而至於顯名唐朝。蒙授官

爵。則有若金楓。厚朝元四年入。金武勳。開元進階游擊將軍。入朝。金欽。開元四年入。金嗣宗。開元十六年。金志良。開元十九年。金端。開元授元郎將。金嗣宗。開元十六年。金志良。開元十九年。金端。開元授元尉。少卿。員外。金志廉。同少卿。授金標。石衛尉。員外。少卿。授金。元。忠。良。授倉部郎中。勅。金元弘。丞簿。已上。見文苑。英。華。諸人。無事蹟之可述。且悉於世紀及諸志。故並不記載。

右新羅

大門藝

開元十四年。黑水靺鞨遣使來朝。詔以其地爲黑水州。仍置長史。遣使鎮押。渤海王武藝遣母弟門藝及其舅任雅相。發兵以擊黑水。門藝曾充質子至京師。開元初還國。至是謂武藝曰。黑水請唐家官吏。卽欲擊之。是背唐也。唐國人衆兵強萬倍於我。一朝結怨。但自取滅亡。昔高麗全盛之時。強兵三十餘萬。抗敵唐家不事賓服。唐兵一臨掃地俱盡。今日渤海之衆



數倍少於高麗。乃欲違背唐家。事必不可。武藝不從。門藝兵至境。又上書固諫。武藝怒。遣從兄大壹夏。代門藝統兵。徵門藝欲殺之。門藝遂棄其衆。間道來奔。詔授左驍衛將軍。武藝尋遣使朝貢。仍上表極言門藝罪狀。請殺之。上密遣門藝往安西。仍報武藝云。門藝遠來歸投。義不可殺。今流向嶺南。已遣去訖。乃留其使馬文軌。葱勿雅。別遣使報之。俄有洩其事者。武藝又上書云。大國示人以信。豈有欺誑之理。今聞門藝不向嶺南。伏請依前殺却。由是鴻臚少卿李道邃。源復。以不能督察官屬。致有漏洩。左遷道邃爲曹州刺史。復爲澤州刺史。遣門藝暫向嶺南以報之。武藝懷怨不已。密遣使至東都。假刺客刺門藝於天津橋南。門藝格之不死。詔河南府捕獲其賊。盡殺之。舊唐書

李懷光

李懷光。渤海靺鞨人也。本姓茹。按渤海茹氏。唐氏其先徙于幽州。常爲朔方列將。以戰功賜姓氏。更名嘉慶。懷光少從軍。以武藝壯勇稱。朔方節度

使郭子儀。禮之益厚。後歷邠寧節度使。從擊朱泚。詔加太尉。賜鐵卷。同上

李多祚

唐玄宗即位。下制曰。以忠報國。典冊所稱。感義捐軀。名節斯在。故羽林衛大將軍上柱國遼陽郡王李多祚。三韓貴種。百戰餘雄。席寵禁營。迺心王室。挺茲誠信。翻陷誅夷。賴彼神明。重覆姦慝。永言徽烈。深合褒崇。宜追歿後之榮。以復生前之命。可還舊官。仍宥其妻子。冊府元龜。○案多祚。本渤海靺鞨酋長。

大昌勃價

開元十三年五月。渤海王大武毅。按武藝之弟。武藝之弟大昌勃價來朝。授左威衛員外將軍。賜紫袍金帶魚袋。留宿衛。十五年四月丁未。勅大昌勃價。久留宿衛。宜放還蕃。庚申。封大昌勃價。襄平縣開國男。賜帛五十疋。同上

大都利行

開元八年八月。册渤海郡王武藝嫡男大都利行。爲桂婁郡王。十四年四月乙丑。大都利行來朝。授左武衛大將軍。員外置留宿衛。十六年四月癸



未。大都利行卒。贈特進兼鴻臚卿。賜絹三百疋粟三百石。命有司吊祭。官造靈輿歸蕃。上同

大能信 茹富仇

貞元十四年十一月戊申。以渤海國王大嵩隣姪能信。為左驍騎衛中郎將。虞侯婁蕃長都督茹富仇。為右武衛將軍。並放還蕃。上同

高翰模

高翰模。渤海國人。一名松。有膂力善騎射好談兵。太祖平渤海。翰模避地高麗。高麗王以女妻之。因罪亡歸遼。屢立戰功。官至中臺省左相。封愨郡開國公。遼史自有傳

大簡之

大簡之。渤海人。畫工。松石小景。畫史要

案渤海人物。如大賢素。

渤海司徒

大鸞河。

宋史

高元固。

渤海全唐詩貢高

慶緒。見松漠

及冊府元龜。詳見交聘條

日本書籍。

詳見交聘條

所稱諸

人。並無事實之可採。故今不備載。

又案遼金史。太康又夏行美。大公鼎。高彪。藥郭師。張浩。高德。基。高衍。王政等十人。皆是為渤海人。而遼金史自有傳。且屬渤海國亡以後人。故置而勿論。

右渤海

# 海東釋史卷第六十七終



# 海東釋史卷第六十八

人物考二高麗

韓申一

後唐時高麗遣其廣評侍郎韓申一來。申一通書史。臨回召對便殿。出新貢林慮漿面賜之。清異錄

朴崑叟

同光年高麗行人至。副使者部少卿上柱國朴崑叟。文雅如中朝賢士。既行吏掃除其館舍。得餘燭半挺。其末紅印篆文曰光濟叟。叟蓋以命燭也。  
上同

按五代史。唐莊宗同光元年。高麗遣使廣評侍郎韓申一。副使春部少卿朴巖來。崑叟當是朴巖之字。

金行成子宗敏 宗訥

太平興國元年。高麗王景宗遣國人金成行。入就學於國子監。二年行成擢進士第。節行成累官至殿中丞。治案高麗也表乞放還。行成自以筮仕朝廷。不願歸本國。又以父母垂老在海外。朝暮思念。恨祿不及。令工圖其像置正寢。與妻史氏居旁室。晨夕定省上食。未嘗少懈。淳化初通判安州被病。知州李範與僚佐數人省之。行成病已篤。泣且言曰。行成外國人。為朝官佐郡政。病且死。未有以報主恩。雖瞑目固有遺恨。二子宗敏宗訥皆幼。家素貧。無他親可依。朝暮委溝壑矣。未久行成死。其妻養二子誓不嫁。織屨以給。範表其事。詔以宗敏補太廟齋郎。令安州月給其家錢參緡。米五斛。長吏歲時存問。宋史

康戡子希齡

高麗信州永寧人。康戡字休祐。父允。三世為兵部侍郎。戡少好學。時紇升與契丹交兵。戡從允戰木葉山下。連中二矢。神色不變。後陷契丹。遁居墨斗嶺。又至黃龍府。間道得歸高麗。時允猶在。開寶中允遣戡隨賓貢肄業。



國學。太平興國二年。登進士第。解褐。大理評事。知湘卿縣。再遷著作佐郎。知江陰軍江州。歷官以清白幹力聞。改太常博士。蘇易簡在翰林。稱其吏才。命為廣南西路轉運副使。賜緋魚。就遷正使。再轉度支員外郎。戶部判官。出知峽越二州。連被詔褒其能政。又為京西轉運使。加工部郎中。賜金紫。戢所至好行事。上章多建白。以竭誠自任。景德三年卒。真宗特以其子希齡為太常寺奉禮郎。給奉供。上同

崔罕

雍熙三年十月。高麗王治遣使朝貢。又遣本國學士崔罕。王彬。詣國子監肄業。淳化三年。上親試諸道貢舉人。詔高麗賓貢進士王彬。崔罕等及第。授將仕郎。守秘書省校書郎。仍遣還本國。上同

王彬

王彬。光州固始人。祖彥英。父仁偁。從其族人潮入閩。潮有閩土。彥英頗用事。潮惡其逼陰欲圖之。彥英覺之。挈家浮海奔新羅。新羅長愛其才用之。

父子相繼執國政。彬十八賓貢入太學。淳化三年。進士及第。歷雍邱尉。城司陰遣人下畿縣。刺史多厲民。令佐至與為賓主。彬至捕鞠之。得所受賂致之法。自是詔親事官。毋得出都城。易右班殿直。辭不受。後以秘書省著作佐郎。通判筠州。歷知撫州。撫州民李甲。饒英。恃財武斷鄉曲。縣莫能制。人告甲語斥乘輿。彬案治之。甲坐逆棄市。英配嶺南州里。肅然。徙知潭州。入判三司戶部。旬院。出為京西轉運使。徙河北。部吏馬崇正。倚章獻太后。姻家豪橫不法。彬發其姦。下吏忤太后意。徙京東。又徙河東。陝西。復為三司鹽鐵判官。判都理欠憑。由司累遷太常少卿卒。同上。○案王彬。宋史自有傳。

朴寅亮金悌

高麗海外諸夷中。最好儒學。祖宗以來。數有賓客貢士登第者。自天聖後十年不通中國。熙寧四年。始復遣使脩貢。因泉州黃慎者為向道。將由四明登岸。比至為海風飄至通州。謝太守云。望斗極而乘槎。初離下國。指桃源而迷路。誤到仙鄉。詞甚切當。使臣御事。民官侍郎金第。按金第即金悌之僞。宋史是通



考亦誤與行。朴寅亮詩尤精。如泗州龜山寺詩云。門前客棹洪濤急。竹下僧碁白日閒等句。中土人亦稱之。寅亮為其國詞臣。以罪廢之。復與金第使中國。澗水燕談

張中為明州象山尉。坐私與高麗人朴寅亮唱和詩。停官。家世舊聞

元豐三年。高麗入貢。有日本國車一乘。正使柳洪副使朴寅亮。先致意館伴官曰。諸侯不貢車服。誠知非禮。但本國欲中朝。略見日本工拙爾。詔許特進。石林燕語

按寅亮文宗朝登科。熙寧及元豐再使中國。麗史自有傳。

洪灌

高麗圖經。洪灌高麗人。清燕閣記通奉大夫寶文閣學士右散騎常侍上護軍唐城郡開國男食邑三百戶賜紫金魚袋洪灌奉教書。記稱寶文清燕二閣。以奉宋帝御製詔勅書畫。佩文齋書畫譜

高麗史。洪灌字無黨。力學善書。效新羅金生筆法。同上○本案云灌與灌同時。雖偏旁互異。當是

一人○案圖經本作洪灌

金仁存

高麗史金仁存字處厚。少登科直翰林院。睿宗在東宮講論語。仁存撰新義進講。移中書舍人。歷開府儀同三司檢校太師門下侍中。卒諡文成。經義考

魏繼廷 朴景綽

元祐二年。高麗使人入貢。上元節於闕前賜酒。賦觀燈詩。時有佳句進奉。副使魏繼廷。案繼廷之偽句。有千仞綵山擎日起。一聲天樂漏雲來。主簿朴景綽。句。有勝事年年傳習久。盛觀全屬遠方賓。補筆談

韓暉如

余大觀間館伴。麗人故事。使人到闕。不過月許。日即遣。時上欲留觀殿試。放榜。及臨上池。遂幾七十日。使者頗修謹。詳雅。余撫之既厚。餞行至占雲館而別。韓繳如。案繳如之偽如馬上忽使人持一大玉帶相贈。余云。此唐故物。其



家世傳以爲寶。今以爲獻。且于笏上自書一詩相示。詩見藝文志余以麗使故事無解挽例。力辭之。其詩雖朴拙。然可見其意。石林燕語

李資謙弟資德

高麗李資謙。官守太師尙書令。高麗素尙族望。而國相多任勳戚。自王運案宣宗娶李氏之後。而案宗爲世子時亦納李女爲妃。由是門戶始光顯。資謙之兄資義。在前代時已爲國相。坐事流竄。故資謙視覆車之戒。每自修飭。俛深信重之。使爲春宮傅友。時案宗尙冲幼。資謙擇博學多聞之士八人。以導翊之。如金端輩。頃自本朝賜第歸國。正預選掄。壬寅夏四月。俛薨。諸弟爭立。先是案宗有五子。而俛居長。資謙已立楷。仲父帶方公。備意欲奪其位。遂與門下侍郎韓繳如案繳如樞密使文公美。謀爲不軌。而禮部尙書李永。吏部侍郎鄭克永。兵部侍郎林存等十餘人爲內應。未及舉而謀泄。卽擒捕下吏。資謙乃諷王。放備於海島。而誅羣惡。連逮支黨數百人。故以定亂之功。進封太師。益加食邑。采地位尙書令。資謙風姿凝

靜儀矩雍容。好賢樂善。雖秉國政。頗知推尊王氏。在夷狄中能扶獎王室。亦可謂賢臣矣。然信讒嗜利。治田疇第宅。阡陌相連。制度侈靡。四方饋遺腐肉常數萬斤。他皆稱是。國人以此鄙之。惜哉。高麗圖經○按麗史資謙爲睿宗及資謙定策立仁宗又納其第三女子王

宣和六年九月。高麗遣使金紫光祿大夫檢校司空知樞密院事上柱國李資德。副使太中大夫尙書禮部侍郎。賜紫金魚袋金富轍。至本朝謝恩進奉。是年有請于上。願得能書者至國中。於是以徐兢爲國信所禮物官。兢奉使時。李資謙爲太師尙書令。高麗國主多納李氏爲后妃。由是門戶光顯。資德其弟也。遊宦紀聞

尹彥植

尹彥植。官接伴正奉大夫刑部尙書柱國。賜紫金魚袋。尹氏素以儒學知名。瓘在王俛時爲樞府。嘗朝貢至中國。而彥植乃其子也。世與李氏通昏。又與資謙厚善。楷在春宮。而彥植亦預引翼之列。故楷立而進官崇貴。彥



植美風姿。人質脩偉。宛然有儒者之風。不可以蠻夷接之也。高麗圖經

金富軾弟富轍

金富軾官同接伴通奉大夫尙書禮部侍郎上護軍。賜紫金魚袋。金氏世爲高麗大族。自前史已載。其與朴氏族望相埒。故其子孫多以文學進。富軾豐貌碩體。面黑目露。然博學強識。善屬文。知古今。爲學士所信服。而無能出其右者。其弟富轍亦有時譽。嘗密訪其兄弟命名之意。盖有所慕云。同上

余昔閱高麗史。愛其臣金富軾之文。又兄弟一名軾一名轍。疑其當宣和時。去元祐未遠。何竊取眉山二公之名。讀游宦記聞云。徐兢以宣和六年使高麗。密訪其兄弟命名之意。盖有所慕。文章動蠻貊。語不虛云。觀此則知余前疑不誤。而是時中國方禁錮蘇黃文章字畫。豈不爲外夷所笑哉。香祖筆記

按富軾。肅宗時登第。歷翰林學士。仁宗十三年。妙清反。據西京。富軾

以元帥平其亂。加太師集賢殿大學士。以文章名世。嘗撰新羅高句麗百濟三國史記五十卷上之。徐兢之來使。富軾爲館伴。兢見富軾善屬文。通古今。樂其爲人。著圖經載其世家。又圖形以歸奏。帝詔司局鏤板以廣其傳。由是名聞天下。後奉使如宋。所至禮待。三掌禮闈。以得士稱。毅宗五年卒。年七十七。配享仁宗。有文集二十卷行于世。

金仁揆

金仁揆官館伴金紫光祿大夫守司空同知樞密院事上柱國。金景融王顓世。太傅守中書令。仁揆卽其子也。顓父徽。案文宗嘗娶金氏女。顓於仁揆有元舅之尊。韓繳如等叛。李資謙挾王楷。以誅群惡。而仁揆與有力焉。故進位司空使居樞府。仁揆頎而美髯。貌魁秀。進止端重。爲所擇。以接使高麗圖經華也。

李之美

李之美官同館伴正議大夫守尙書兵部侍郎上護軍。賜紫金魚袋。高麗



每中朝人使至。必遴擇人才。或經朝貢者。以爲館伴。之美卽資謙之子。風貌美秀。往嘗入覲天闕。往館累月。其國事無巨細。悉稟之。之美處決無不中禮。進趨詳雅。綽有華風。每言及朝廷。必惓惓有傾葵之意。其忠誠亦可嘉尙云。同上

臣聞東南之夷高麗人材最盛。今使者入境。皆擇臣屬通敏者。付以將迎之禮。以州牧則有若刑部侍郎知全州吳俊和。禮部侍郎知清州洪若伊。戶部侍郎知廣州陳淑。以迎勞餞送。則有若銀青光祿大夫吏部侍郎朴昇中。開府儀同三司守太保中書侍郎中書門下平章事金若溫。開府儀同三司守太保門下侍郎同中書門下平章事崔洪宰。開府儀同三司守太保門下侍郎兼中書門下平章事李文友。同知樞密院事拓俊京。李資德。凡此皆王之近臣也。除三府四會之外。與之燕飲酬酢。衍衍如也。以和覲送遺。則有若戶部侍郎梁麟。金惟棟。刑部侍郎林景清。工部侍郎盧令。中侍大夫黃君裳。工部郎中鄭俊。左司郎中李

之甫。殿前承旨林寵臣。朝散郎秘書丞金端。閣門使金輔臣。閣門通事舍人李穎之。曹祺。內殿崇班胡仁穎。引進使王儀。閣門祇候高唐。愈敏。仲衡。通事舍人李漸。梁文矩。中衛郎劉及。中亮郎彭京。忠訓郎王承。成忠郎李俊琦。金世安。保義郎李俊異。承節郎許宜。何景。陳彥卿。以傳命贊導。則有若正議大夫禮部尙書金富侁。通議大夫殿中監鄭覃。尙書李琦。中亮大夫知閣門事沈安之。中亮大夫閣門副使劉文志。閣門引進使金義元。閣門通事舍人沈起。王洙。金鐸。李銳。材金鈍。正黃觀李淑。陳廸。閣門祇候尹仁勇。朴承鄭。擇陳備。通事舍人李德升。吳子岐。卓安。皆以才能辯博。乃膺是選。爰自相見。以迄言旋。其相與燕樂游觀。揖遜之儀。文采雍容。有足觀者。今姑自李資謙而下。圖其形者五人。并其族望。而爲之說。同上

金始祖函普

金始祖函普高麗人。初從高麗來。年已六十餘矣。兄阿古迺。好佛。留高麗。



不肯從曰後世子孫必有能相聚者。吾不能去也。獨與弟保活里俱。始祖居完顏部僕幹水之涯。保活里居耶懶。其後胡十門。以曷蘇館歸太祖。自言其祖兄弟三人。相別而去。蓋自謂阿古迺之後。石土門迪古乃保活里之裔也。○又胡十門傳。胡十門者。曷蘇館人。胡十門不肯從。召其族人謀曰。吾遠祖兄弟三人。同出高麗。今皇帝之祖。入女真。吾祖留高麗。自高麗歸于遼。始祖吾與皇帝皆三祖之後。胡十門自言如此。蓋自謂阿古迺之後云。至完顏部居。久之。其部人兩族交惡。鬪而不能解。完顏部人謂始祖曰。若能解此怨。使兩族不相殺。部有賢女。年六十而未嫁。當以相配。始祖曰。諾。迺自往諭之。怨家曰。謹如約。部衆信服之。以青牛一并許歸。六十之婦。始祖乃以青牛為聘禮而納之。後生二男。長曰烏魯。次曰幹魯。一女注思板。遂為完顏部人。天會十四年。追諡景元皇帝。金史

按松漠記聞。女真酋長乃新羅人。號完顏氏。完顏猶漢言王也。兄弟三人。一為熟女真酋長。完顏年六十餘。女真妻之以女。亦六十餘生二子。其長即胡來也。自此傳三人。至楊哥太師。又傳阿骨打。此與函

普事相類。而又曰。金主九代祖名龔福。追諡景元皇帝。號始祖龔福。即函普之音轉也。平山府志人物載。本州僧今俊。遁入女真。居阿之古村。是為金之先。或曰。平州僧今幸之子克守。初入女真。娶女真女。生子曰古乙。金祖阿骨打即其後也。但金俊克守。未知孰為函普。無所考。

又案金史。石土門耶懶路完顏部人。世為其部長。思敬本名撒。改押懶。河人也。石土門之子烏延蒲盧渾。曷懶路烏古敵。昏山人也。烏延鶻沙虎。曷懶路克敵。昏山人也。蒲延渾之兄烏延胡里段。曷懶路星。顯水。今三府人也。烏延吾里補。曷懶路禪嶺人也。烏延蒲轄路。曷懶路人也。完顏阿里不孫。曷懶路泰甲。必刺。猛安人也。完顏仲德合。懶路人也。蓋合懶押懶耶懶。即曷懶之訛。而今咸興以北地。則石土門以下諸人。繫是我國人物。然而麗朝咸興以北未入版圖。且金史皆自有傳。故此不備載。



洪福源子茶邱 君祥 茶邱子萬

洪福源其先中國人。唐遣才子八人往教高麗。洪其一也。子孫世貴於三韓。名所居曰唐城。按今南陽府父大宣。以都領鎮麟州。按今麟州屬義州福源為神騎都領。因家焉。歲丙子。金源契丹九萬餘衆。竄入高麗。丁丑九月。奪江東城池。據之。戊寅冬十二月。太祖命哈赤吉札刺將兵追討。大宣迎降。與哈赤吉等共擊之。降其元帥趙忠。壬午冬十月。又遣著古與等十二人。窺覘納款。虛實。還遇害。辛卯秋九月。太宗命將撒里塔討之。福源率先附州縣之民。與撒禮塔。按即撒里塔音里與禮通用併力攻未附者。又與阿兒禿等進至王城。高麗王噉。乃遣其弟懷安公請降。遂置王京及州縣達魯花赤七十二人以鎮之。師還。壬辰夏六月。高麗復叛。殺所置達魯花赤。悉驅國人入據江華島。福源招集北界四十餘城遺民以待。秋八月。太宗復遣撒里塔將兵來討。福源盡率所部合攻之。至王京據仁城。按今龍仁縣撒里塔中流矢卒。其副帖哥引兵還。唯福源留屯。癸巳冬十月。高麗悉衆來攻西京。屠其民劫

大宣以東。福源遂盡以所招集北界之衆來歸。處於遼陽瀋陽之間。帝嘉其忠。甲午夏五月。特賜金符。為管領歸附高麗軍民長官。仍令招討本國未附人民。又降旨諭高麗之民。有執王噉。及元構難之人來朝者。與洪福源同於東京居之。優加恩禮擢用。若大兵既加。拒者死。降者生。其降民令福源統之。乙未。帝命唐古拔都兒與福源進討。攻拔龍岡咸從二縣。鳳海洞三州山城。及慈州。又拔金山歸信昌朔州。己亥春二月入朝。賜以鎧甲弓矢及金織文段。金銀器金鞍勒等。乙巳。定宗命阿母罕將兵與福源共拔咸州平鹵城。辛亥。憲宗即位。改授虎符。仍為前後歸附高麗軍民長官。癸丑。從諸生耶虎攻禾山東州春州三角山楊根天龍等城。拔之。甲寅。與扎剌台合兵攻光州安城忠州玄鳳珍原甲向玉果等城。又拔之。戊午。福源遣其子茶邱從札刺台軍。會高麗族子王綽入質。陰欲併統本國歸順人民。讒福源于帝。遂見殺。年五十三。後贈嘉議大夫瀋陽侯。諡忠憲。子七人。俊奇君祥最知名。元史○元史本傳全錄



俊奇小字茶邱。福源第二子也。幼從軍。以驍勇受知世宗。嘗以小字呼之。中統二年秋。茶邱雪父冤。世祖閱之。詔諭可就。帶元降虎符。襲父職。管領歸附高麗軍民總管。至元六年。高麗權臣林衍叛。冬十一月。詔以其軍三千。從國王頭輦哥討平之。遷江華島所有臣民。復歸王京。十二月。帝命茶邱率兵往鳳州等處。立屯田總管府。八年二月。入朝。賜鈔百緡。林衍餘黨裴仲孫等。立高麗王禎親屬承化侯爲王。引三別抄軍。據珍島以叛。五月。茶邱奉旨。偕經略使忻都。進兵討之。破其軍。殺承化侯。其黨金通精。率餘衆走耽羅。帝遣侍衛親軍千戶王岑。與茶邱議征取之策。茶邱表陳通精之黨。多在王京。可使招之。招而不從。擊之未晚。從之。俄奉旨往羅州道。監造戰船。且招降耽羅。茶邱得通精之姪金永等七人。俾招之。通精不從。留金永餘盡殺之。十年。詔茶邱與忻都率兵渡海。擊破耽羅。獲通精殺之。悉免其脅從者。高麗始平。十一年。命監造戰船。經營日本國事。三月。超昭勇大將軍安撫使。高麗軍民總管如故。己卯。命茶邱提點高麗農事。八月。授

東征右副元帥。與都元帥忽敦等。領舟師二萬。渡海征日本。拔對馬一岐。宜蠻等島。十四年正月。授鎮國上將軍。東征都元帥。鎮高麗。二月。率蒙古高麗女直漢軍。從丞相伯顏北征。叛臣只魯瓦列等。十七年。授龍虎衛上將軍。征東行省右丞。十八年。與右丞忻都。將舟師四萬。由高麗金州合浦以進。時右丞范文虎等。將兵十萬。由慶元定海等處渡海。期至日本一岐平戶等島。合兵登岸。兵未交。秋八月。風壞舟而還。十九年十月。命茶邱於平灤黑塌兒。監造戰船七百艘。以圖後舉。二十一年十二月。復授征東行省右丞。二十四年。乃顏叛。車駕親征。賜以翎根甲寶刀。命率高麗女直漢軍。扈從凱旋。授遼陽等處行尙書省右丞。二十七年。叛王哈丹等。竄入高麗。侵撓其國。西京距遼陽二千里。皆騷動。中書省特起茶邱鎮遼左。賜以金字圖符。命便宜行事。二十八年。以疾卒。年四十八。子四人。長曰壽。上同君祥。小字雙叔。福源第五子也。年十四。隨兄茶邱。見世祖於上京。帝悅。命劉秉忠相之。秉忠曰。是兒目視不凡。後必以功名顯。但當致力於學。令選



師儒誨之。至元三年。籍高麗民三百人爲兵。令君祥統之。帝嘗閱江南海東輿地圖。欲召知者詢其險易。左丞相伯顏。樞密副使合達。以君祥應旨。召對詳明。帝悅。酌以巨觥。顧謂伯顏曰。是兒遠大器也。六年。林衍叛。從頭輦哥征之。十一年。命伯顏伐宋。君祥以蒙古漢軍都鎮撫從行。宋降陞武略將軍。中衛親軍千戶。二十四年。乃顏叛。從世祖親征。凱還。加輔國上將軍。類次車駕起居爲東征錄。二十八年。授遼陽行省右丞。俄加集賢殿大學士。復奉使高麗還。欲僉書樞密院使。成宗大德二年。詔使高麗。臺臣劾君祥以他事。中道追回。已而事罷。十年秋。改遼陽右丞。請於朝宜新省治。增巡兵。設儒學。提舉都鎮撫等員。以興文化。修武備。事未成。武宗即位。徵改遼陽行省平章政事。至大二年卒。子邁同知開元總管府事。同上萬小字重喜。至元十三年入宿衛。十八年襲職爲懷遠大將軍。安撫使高麗軍民總管。仍佩父茶邱所佩虎符。二十四年。乃顏叛。率兵征之。哈丹叛。重喜從諸王愛牙哈赤征之。二十七年九月。至禪春。與哈丹禿魯干戰。二

十八年二月。從平章薛闡干至高麗青州。五月與哈丹戰。大敗之。十月薛闡干以重喜入朝。且以其功聞。帝嘉之。賜玉帶一。白金五十兩。授龍虎衛上將軍。遼陽等處行中書省右丞。二十九年。仍佩元降虎符。總管高麗女直漢軍萬戶。兼安撫使。高麗軍民總管。至大二年。謫漳州。行至杭。遇赦而止。明年卒。子滋襲爵。同上

高麗初。關叛服不常。福源父子戮力戎行。父死非罪。嗣子克昌。竟平其

國。奄有海壇。功成論定。讒口何傷。續弘簡錄

王綽子阿刺帖木兒 濶濶帖木兒 兀愛

王綽高麗王噉之猶子也。美容儀。慷慨有志略。善騎射。讀書通大義。以質子入朝。歲癸丑。高麗權臣高令公叛。憲宗命耶虎大王東征。綽奉旨爲使。講和。仍鎮守其地。時高麗人戶新附者。就命綽總之。中統元年。授金符總管陞佩虎符。兼領軍民。三年。率兵征濟南李壇。至元七年。高麗臣林衍叛。世祖遣頭輦哥國王討之。綽簽領部民一千三百戶。與國王同行。是年十



一月以疾辭還家居。二十年九月卒。壽六十一。子三人。阿刺帖木兒襲職授虎符總管高麗人戶。至元八年。將兵討叛賊金通精。賊敗走耽羅。十一年進昭勇大將軍。從都元帥忽都征日本國。預有戰功。五年加鎮國上將軍。安撫使高麗軍民總管。尋陞輔國上將軍。東征左副都元帥。十八年復征日本。遇風濤。遂沒于軍。濶濶帖木兒入侍武宗。潛邸積勞。授太中大夫。管民總管。兀愛襲兄阿刺帖木兒職。佩金虎符。授安遠大將軍。安撫使高麗軍民總管。東征左副都元帥。二十四年。乃顏叛。力戰屢捷。復正月魯兒那演討塔不歹朶歡大王于蒙哥山那江。統兵五千餘衆。與入刺塔赤脫歡。相拒絕流。戰黑龍江。箭中右臂。忍傷復戰。敵大敗。二十五年。征哈丹秃魯。隸平章濶里帖木兒麾下。論功居多。明年加授昭武大將軍。遼陽等處行中書省事。又明年哈丹等入寇高麗國境。遣兀愛鎮守。仍修城壁。嚴卒伍。軍威大振。賊遂潛遁。九月哈丹秃魯于復寇疆春。兀愛引兵擊却之。二十八年。入覲世祖于內殿。嘉其戰功。賜尙方玉帶及銀酒器。二十九年。改

東征左副都元帥府。立總管高麗女直漢軍萬戶府。乃授兀愛三珠虎符。陞鎮國上將軍總管高麗女直漢軍萬戶府。兼瀋陽安撫使高麗軍民總管。元史○元史本傳全錄

鄭可臣 閔漬

東國史略。高麗世子如元。謁帝便殿。問讀何書。對曰有師儒鄭可臣。閔漬從行。宿衛之暇。時從質問孝經論語。帝悅。命世子引與俱入。賜坐。問本國世代相傳之序。理亂之跡。風俗之宜。聽之不倦。其後命公卿議征交趾。又召與同議。二人對稱旨。於是授可臣翰林學士。漬直學士。日下舊聞高麗史。帝召見世子於紫檀殿。可臣從。帝使之坐。仍命脫笠曰。秀才不須編髮。宜着巾。御案前有物。大圓小銳。色潔而貞。高尺有五寸。內可受酒數斗云。靡訶鉢國所獻駱駝鳥卵也。帝命世子觀之。仍賜世子及從臣酒。命可臣賦詩。可臣獻詩。詩見藝文志帝嘉之。輟賜御羹。同上

昆田案可臣在東國。撰千秋金鏡錄。漬增修之。曰世代編年節要七卷。



又撰本國編年綱目四十二卷。惜其書不可得見也。同上

按高麗史。可臣字獻之。羅州人。鄉貢進士。松壽之子。漬字龍涎。驪興人。平章事。令謨五世孫也。可臣以高宗朝登第。累歷華要。官至司空。諡文靖。性正直。端嚴。諳練典故。嘗扁所居曰雪齋。日與賢士大夫商確古今。雖至大官。常如書生。漬以元宗朝擢魁科。歷集賢殿大學士。以僉議政丞致仕。封驪興君。雖有文藻。而諂附內人。且不知性理之學。其論有背於聖人。至以朱子昭穆之議為非。所見之偏類此。忠烈王十六年。世子如元。可臣與漬從行。對輒稱旨。命不辱國。時論多之。  
李齊賢

東國史畧。忠肅王燾元年。元命上王留京師。上王構萬卷堂于燕邸。召李齊賢充府中。迎致文儒。閣復姚燧。趙孟頫。虞集等。與之從游。以考究書史自娛。同上

按齊賢字仲思。忠烈王二十七年。年十五。中丙科。自幼巖然為文。已

有作者氣。及登第。討論經籍。益勤淹貫。精研奉使西蜀。所至題咏。贈炙人口。忠穆王時。以右政丞加功臣號。封雞林府院君。卒諡文忠。後配享恭愍王廟庭。所著益齋藁十卷。櫟翁稗說行于世。

李公遂

東國史畧。高麗恭愍王遣贊成事李公遂如元。進陳情表。公遂奇后外從兄也。太子以帝命。公遂上廣寒殿。指殿額及金玉柱問之。公遂對以諷語。太子以其言奏帝。帝曰。朕固知此老賢。汝外家唯此一老耳。同上

按公遂益州人。讞部典書行儉之孫。擢魁科。恭愍王時。拜僉議評理。進贊成事。奉使如元。後封益山府院君。卒諡文忠。配享恭愍廟庭。

三寶奴

三寶奴。高麗人。奇氏。順帝后族。武宗時。由渤海國公。加應國公。續文獻通考至正二十三年。祁后按奇后議立塔思帖木兒為高麗王。以祁族子三寶奴為元子。以兵萬人送之國。至鴨綠江敗還。庚申外史詳見世記



僕遜

僕遜回鶻人。初名百寮。世居僕鞏河。因以為氏。家世仕元。元順帝時中進士。歷翰林應奉文字宣政院斷事官。選為端本堂正字。恭愍王七年。避兵東來。賜第。封高昌伯。改封富原侯。明詩綜

金濤

金濤。高麗國之延安人也。洪武辛亥。高麗國人入試者三。濤登進士二甲第五。授山東安邱縣丞。歸為其國相。兗州別集

李仁老

高麗史。李仁老字眉叟。能屬文。善草隸。佩文齋書畫譜

金方慶

高麗史。金方慶字本然。志學善書。官至兵部尙書翰林學士。同上

金恂按恂方慶之子

高麗史。金恂字歸厚。工隸書。為密直副使。同上

郭預

高麗史。郭預字先甲。善屬文。書法瘦勁。成一家體。同上

金暉

高麗史。金暉字用晦。密直學士。善隸書。同上

李穎

高麗史。李穎博聞強記。工草隸。為翰林學士承旨。同上

李岳

高麗史。李岳字古雲。工穎書。為右承旨。同上

成石璘

高麗史。成石璘字自修。善書。同上

尹彥旼按史彥旼高麗史作尹彥旼侍中璘子也此云姓史字之誤也

高麗史。史彥文聰悟過人。善書畫。為尙食奉御。同上

李寧子光弼



高麗史。李寧少以畫知名。仁宗朝隨樞密使李資德入宋。徽宗命翰林待詔王可訓陳德之田宗仁趙守宗等從寧學畫。且勅寧畫本國禮成江圖。既進。徽宗嗟賞曰。比來高麗畫工隨使至者多矣。唯寧爲妙手。賜酒食錦綺綾帽。寧少師內殿崇班李俊異。俊異妬後進。有能畫者少推許。仁宗召俊異。示寧所畫山水。俊異愕然曰。此畫如在異國。臣必以千金購之。又宋商獻圖畫。仁宗以爲中華奇品。悅之。召寧誇示。寧曰。是臣筆也。仁宗不信。寧取圖折裝背。有姓名。王益愛幸。及毅宗時。內閣繪事悉主之。子光弼亦以畫見寵於明宗。同上

鄭夢周

鄭夢周字達可。高麗迎日縣人。初名夢蘭。又名夢龍。既長。改今名。恭愍王九年。應舉擢第一人。累官政堂文學。進三司左使。改進賢館大提學。知經筵春秋館事。兼成均大司成。領書雲館事。初封永原君。加封益陽郡忠義君。後贈大匡輔國崇祿大夫。領議政府事。修文殿大提學。兼藝文春秋館

事。益陽府院君。諡文忠。有圃隱集。明詩綜

夢周爲人豪邁絕倫。負忠孝大節。詩文跌宕峻潔。精研性理之學。李穡爲大司成。選爲學官。時經書至東方。只朱子集註。夢周講論辨難。縱橫引據。往往超出其表。穡歎服曰。此東方理學之祖也。親表廬墓三年。東國之俗爲之一變。洪武七年。恭愍王被弑。立辛禔。宰相李仁任殺我使人蔡諷。議降北元。夢周爲大司成。上書力言其非。被放。復遣使日本。愈年乃還。禍九年。爲政堂文學。麗人得罪天朝。懼討。議遣使賀聖節。請諡承襲。大臣皆相顧規避。禍召諭欲遣夢周。夢周慨然即日啓行。兼程而至。我太祖皇帝嘉歎。遣還優禮。遣還未幾。復如京師。請蠲減歲貢。奏對詳明。太祖優詔許之。麗人賴焉。列朝詩集

夢周負忠孝大節。精究性理。爲東方理學之祖。守門下侍郎。時國家多故。處大事。決大議。不動聲色。張設咸當。時稱王佐之才。廣輿詩

李穡



李穡字穎叔。中征東省鄉試第一。明年赴元廷試。擢二甲進士。授應奉翰林文字。累官政堂文學。封韓山府院君。進位門下侍郎。封韓山伯。卒諡文靖公。有牧隱集。明詩綜

穡天資明敏。博通羣籍。為詩文操紙筆立就。平生無疾言遽色。不治生產。雖至屢空泊如也。恭愍王二年。擢元朝制科第二甲第二名。授應奉翰林文字。承仕郎同知制誥。兼國史編修官。六年為諫官。十六年判開城府事。兼大司成。以興起斯文為己任。增置生徒。選經術之士。鄭夢周、李崇仁等為學官。更定學式。日坐明倫堂。分業執經論難不倦。於是學者益集。十七年都簽議侍中柳濯等極諫影殿之役。下巡軍獄將殺之。命穡製教諭。衆穡請罪名而不奉教。顯大怒并下獄。穡抗對不屈。顯感悟。命釋濯等。二十年為政堂文學。掌詞翰數十年。屢見稱于中國。辛禡十三年。以韓山府院君。掌貢舉用舊例。享禡于花園。禡以師傅敬穡。親執手入命對榻坐。穡固辭。禡親牽厩鞍馬賜之。列朝詩集

李崇仁

李崇仁字子安。京山府人。恭愍王時登第。官至簽書密直司事同知春秋館事。明詩綜

崇仁天資英銳。文詞典雅。李穡稱之曰此子文章。求之中國不多得也。李仁任議迎元使。崇仁上書都堂曰。若迎北使。舉國之人皆蒙亂賊之罪。仁任不受其書。與鄭夢周等並流。已而復用為簽書密直司事。洪武二十一年。副侍中李穡如京師賀正朝。請王官監國。次年流京山府。三年召還。列朝詩集

鄭樞

鄭樞恭愍王十四年。為左司議。與正言李存吾極論辛毗之奸。顯怒。召樞等面責。毗與顯并據胡床。存吾目毗叱之。毗不覺下床。顯愈怒。下巡運獄。曰。畏存吾怒目也。命李穡鞠之。問樞等誰誘爾上疏。樞曰。見上委政非人。將危社稷。不得默默。豈待人誘。穡曰。不可令公之故。開殺諫官之例。免死。



貶東萊縣令。同上

按樞字公權。恭愍初中第。以左司議大夫。論辛屯貶東萊。後召還拜成均大司成。授書辛禍。禍即位。歷簽書密直政堂文學。賜功臣號。八年卒。諡文簡。所著圓齋集行于世。

金九容

金九容初名齊閔。字敬之。安東人。中進士。拜三司左尹。與李崇仁權近。上書都堂。阻迎北元使。竄竹州。召為左司議大夫。終成均大司成。尋流大理

衛。明詩綜

敬之年十六中進士。國王命賦牧丹詩。敬之居首。既因諫迎元使被流。扁所居曰六友堂。以詩酒自娛。亦蕭灑之士也。靜志居詩話

李詹

李詹洪州人。恭愍王時及第。授藝文簡閱。三轉為正言。歷知申事。明詩綜金九容初與李崇仁等。上書都堂。阻迎北元使被流。詹時為諫議。上疏請

誅李仁任池淵。下獄拷訊。並杖流之。列朝詩集

趙云侂

趙云侂高麗豐壤縣人。恭愍王六年登第。調安東書記。累轉閣門舍人。以刑部員外郎。從王南幸。遷國子直講。歷全羅海西楊廣三道按廉使。辛禍三年。起授左諫議大夫。辛昌立。召拜簽書密直司事。升同知。恭讓王二年。出為鷄林府尹。我太宗立授江陵大都護府使。以病辭。又拜簡校政堂文學。不受祿。明詩綜

趙云侂嘉靖中。為江履道江陵府使。有惠政。邑人為立祠。列朝詩集

云侂以典法郎。退居尙州露陰山下。自號石澗棲霞翁。出入騎牛。超然有世外之想。及轉判典校。復退居廣州古垣江邨。營板橋沙平兩院。自稱院主。敝衣草履。與役徒同勞苦。臨終自誌其墓云。趙云侂本豐壤人。高麗太祖臣。平章事。趙孟三十代孫。恭愍代興安君李仁復門下。登科。歷仕中外。佩印五州。觀風四道。亦無聲績。亦無過譽。年七十三年病終。廣州古垣城。



無後。以日月為珠璣。以清風明月為奠。而葬于古楊州峩嵯山南。銘曰。孔子杏壇上。釋迦雙樹下。古今聖賢人。豈有獨存者。可謂嶽奇跌宕之士矣。錢氏列朝詩定為嘉靖中人。然當以鄭氏高麗史為正。詩話居

權近

權近初名晉。字可遠。一字思叔。號陽村。高麗秀才。明詩綜

辛禡時。近為左司議大夫。禡曰。此人為諫官。使予不得遊幸。何可近侍。合

令防倭耳。經義考

權近字思叔。別字陽村。洪武中至南京。高皇優禮待之。賜衣賜食。命賦詩。帝覽之稱歎。因命與劉三吾許觀景清戴德彝張信輩。諧遊南北市來賓。重譯鶴鳴醉仙諸樓。帝又賜以御製三詩。此洪武丙子歲事。曝書亭集

右高麗

### 海東繹史卷第六十八終

## 海東繹史卷第六十九

人物考三本朝

鄭道傳

鄭道傳初與李崇仁上書都堂。阻迎北元使。復自請執政。曰。我當斬使首而來。不爾則縛送于明。為李仁任所惡。流于會津。列朝詩集道傳官右軍總制使。我太宗立召為奉化郡忠義君。明詩綜

申叔舟孫從漢

申叔舟字汎翁。高麗人。自右弼善歷禮曹判書。積官至議政府領議政。以功封高靈君。同上

叔舟於景泰二年八月。國人鄭麟趾進高麗史表。修史官三十二人。叔舟與焉。衛曰。中訓大夫集賢殿直提學知制誥世子右輔德兼春秋官。記注官知承文院事。臣申叔舟。天順元年。官議政府右贊成。四年進左議政。成



化七年十二月。奉國令撰海東諸國記。書成作序。書銜曰輸忠協策靖難同德佐翼保社炳幾定難翊載純誠明亮經濟弘化佐理功臣大匡輔國崇祿大夫議政府領議政領經筵藝文館春秋館弘文館觀象監事禮曹判書高靈府院君申叔舟。紀書日本代序及其八道六十六州頗詳。所著詩集二十卷。孫從濩編。寧都董尙書越使其國爲作序。詩話居天順四年。張寧使朝鮮。館伴有左議政申叔舟。列朝詩集○廣輿記申叔舟使朝鮮叔舟爲館伴唱和甚多申從濩叔舟從孫。官成均直講。明詩綜

南袞

南袞吏曹叅判兼同知書筵事五衛都摠府都摠管。正德九年。重輯三綱行實。壬午年。以議政府左議政爲讀卷官。詩集

權擘

權擘由吏曹判書累遷至右議政。明詩綜

陳緝熙使朝鮮。國人賦詩繼和者。自朴原亨按元亨之譌申叔舟外。有若仁順府尹寶文閣提學金守温。領議政鄭麟趾。禮曹叅判盧叔同。禮曹判書洪允成。兼成均司成金鈞。金末。左承旨曹錫門。而權擘爲之作序。書銜曰吏曹判書集賢殿大提學知春秋館事。後二年。進議政府右贊成。明年進右議政。其序略云。詩者人心之感物而形於言也。心之所感。旣不能無邪正。故言之所形。亦不能無是非。唯聖人在上。則人皆親被其化。以成其德。有以得夫性情之正。故其所感而發於言者。粹然無不出於正矣。其持論中繩尺。詩話居

朴元亨子安命 安性

朴原亨按當作元亨官戶曹判書。調刑曹判書。明詩綜張寧贈朴判書詩序。予來朝鮮。國之諸臣無日不交相候問。皆雅有禮度。可道。其間迎送陪從。所與朝夕共處者。惟刑曹判書朴君一人最久。判書老成文雅。中敏外嚴。加以謙密不矯。得藩佐體。讀書能文章。善辭令。有古



列國大夫之風。自義州往復幾一月。雖勞頓不息。始終未嘗有惰容。非恒不振者。能之乎。予初至。判書遣二子安命安性。謁拜館下。進退肅雍。不敢當交接禮。家教之隆。因亦可見。是皆人所難。而判書具有之。風塵空谷中。邈然之喜。何可多得也。茲將違遠彼此之情。不能不相為動色。因成近體一章。既以叙區區之懷。且以塞判書之請。斯文古意。是又不能以名義相律也。不識見者。以予言為何如。奉使錄

天順元年。使朝鮮者。翰林修撰吳陳鑑。緝熙太常博士會稽高閏。居平三年奉使。則刑科給事中餘姚陳嘉猷。世用四年奉使。則禮科給事中海監張寧。靖之。原亨。按元亨凡三充館伴。靖之贈詩云。朝鮮賢臣朴判書。老成文物非凡儒。蓋其國中翹楚也。靜居志詩話

張靖之兩使朝鮮。水館星郵留題殆遍。陪臣朴元亨以刑曹判司為館伴。詩篇酬和殊不相下。及偕登太平館樓。黃門成七言長律六十韻。元亨誦至溪流殘白春前雪。柳折新黃夜半風之句。乃閣筆曰。不能屬和矣。同上

徐居正

徐居正字剛中。議政府左叅贊。有文學。列朝詩集成化丙申。祁主事順使朝鮮。居正充遠迎使。既為館伴。因時與倡和。為序其北征藁者。天順庚辰。居正奉王命入覲而作也。順稱其博古通經。長篇短章淵淵乎有本。浩浩乎不窮。與中國之能詩者。殊不相遠云。靜志居詩話

許琮

許琮字宗卿。安興人。由進士為吏曹判書。積官至叅政府議政。明詩綜孝宗即阼之初。以右春坊右庶子兼翰林院侍講。寧都董公越。工科右給事中。上元王公敞。頒詔于朝鮮。宗卿時為館伴。繼和之作。綽有唐人風格。句如春歸飛鳥外。天濶落帆中。細雨全沈樹。孤城半帶烟。東風芟蔓水。斜日竹枝歌。風急搏羊角。波翻起雁羣。官橋晴曬網。野渡晚維舟。俱清婉可誦。董公為作序。稱其音律諧暢。蕭然出塵。非虛譽也。董公後仕至南京工部尚書。贈太子太保。諡文僖公。王亦仕至太子少保。兵部尚書。贈太子太



保宗卿祖愔字原德。官奉嘗。有梅軒集。曾祖錦字在中。官判書。有野堂集。見龔吳兩公序。詩話 靜志居

成倪

成倪官西京觀察使。明詩 綜

朝鮮兵曹判書魚世謙。宏治元年。序皇華集。錄倪詩四首。王尙書稱爲成中樞。又稱成同知。又爲作風月樓記。則云。西京觀察使。惜成化一朝奉使之詩無存。未能詳考矣。詩話 靜志居

案董越風月樓記曰。三月既望。畢使事西歸。至平壤。時館伴吏曹許君。預約西京觀察使成君倪。具舟候予大同江上。且請南泛入舊城。尋箕子遺蹟。遂解纜。自南門入。至斯樓。設燕。吏曹觀察亦就次。吏曹清明可掬。觀察內秀而文。皆於風月無負者。本文止此據靜志居詩話。本記知傳於中國書。而無從得見。故今取輿地勝覽所載者。節錄焉。

李荇

李荇字擇之。官議政府右贊善。明詩 綜

嘉靖元年。世宗入繼大統。奉使朝鮮者。翰林修撰歙縣唐臯守之。兵科給事中涿州史道克弘。其時館伴唯李荇詩最多。餘若金議政詮。南議政袞。鄭寺正士龍。李寺副希輔。尹承旨希仁。徐承旨厚。蘇司成世讓。李判書沆。又不知爵秩者。二人洪淑成雲。皆有賡酬之作。然必以荇爲巨擘焉。靜志居詩話

盧公弼

盧公弼安州人。官戶曹判書。明詩 綜

弘治五年。兵部郎中南昌艾璞德潤使朝鮮。公弼充遠接使。亦有詩贈答。知成均館事洪遺達爲之序。詩話 靜志居

鄭士龍

鄭士龍字雲卿。鼎津人。由內資寺正。遷刑曹判書。歷漢城府判尹。改戶曹判書。再改吏曹判書。塔資憲大夫。有湖陰草堂集。明詩 綜



雲卿嘉靖中。五充館伴。道交禮接。為羣公所稱。唐守之贈詩云。鄭子有詩才。豈在鷓鴣下。龔雲岡則謂其沉著冲澹。不為綺麗艷冶之辭。有唐人之遺意。嘗築十玩堂于鼎津。十玩者。竹梅松菊水石。并楮研筆墨而十也。守之及史給事克弘。皆為之賦詩。及華亭張行人承憲奉使。國王刊其詩入皇華集。俾雲卿序之。謂古之詩人類皆有為而作。未嘗為無益之辭。是亦得詩人之旨者也。句如不謂交觀地。翻成送別亭。具饒韻致。詩話

蘇世讓

蘇世讓字彥謙。初官成均館司成。遷戶曹判書。歷議政府左贊成。明詩

彥謙自嘉靖元年。即與使臣唱和。十六年十八年。凡三充館伴。詩雖平衍亦稱具品。詩話

金安老附金麟孫 金謹思 尹殷輔 黃琦

金安老字頤叔。歷官議政府左議政。領書筵監春秋館事兼弘文館藝文館大提學。知成均館事。階崇祿大夫。明詩

朝鮮君臣最稱好事。使者輜軒一至。即令館伴遠迎。屬和詩章。連篇累牘。龔修撰用卿鳴治。吳給事希孟子醇。於嘉靖十六年奉使。國王遣陪臣十人。陪讌漢江之上。汎楊花渡登龍頭峰。縱觀江山之勝。十人者。金議政安老。蘇判書世讓。尹判書仁鏡。金叅贊麟孫。沈判書彥光。吳判尹潔。許叅贊洽。鄭判書士龍。許叅判沆。朴承旨洪麟。皆國中名士。此外復有金議政謹思。尹議政殷輔。黃承旨憲。朴承旨守良。黃承旨琦。鄭叅判百朋。開城韓留守胤昌。京畿金觀察希說。平安道李觀察龜齡。中樞李同知希輔。咸有詩篇。繼和極東國一時之盛。皇華是集安老實序之。詩話

金安國

金安國字國卿。號慕齋。官刑曹判書。至領議政。有慕齋集。同上使東國者。前有張芳洲。後有華鴻山。皆中國之詩伯。鴻山至日。館伴十有



一人非有不每篇踵韻。然中律者寡矣。十一人者。議政府領議政尹殷輔。議政府右議政金克成。議政府左叅贊柳灌。戶曹判書尹仁鏡。吏曹判書成世昌。禮曹判書李龜齡。工曹判書尹世豪。漢城府尹鄭士龍。承政院都承旨黃琦。左承旨申瑛。及安國也。鴻山留國中僅五日而返。此見於皇華集者。不能多焉。詩話 靜志居

沈彥光

沈彥光字子求。官吏曹判書。

子求望遠亭詩有曰白雁依寒渚。青驢渡小橋之句。頗饒晚唐人風韻。徐敬德花潭集有次留守沈相國彥慶韻詩。當是其景弟。詩話 靜志居

許洽沈

許洽叅政琮之孫。官至議政府右叅贊。明詩 綜

洽與弟沈。具有詩名。嘗集其先世詩。號陽川世藁。沈官吏曹叅判。兄弟皆執國政。詩有漁店日斜遙笛起。海門風急曉帆開之句。亦覺爽氣殊倫。詩話 靜志

居時

申光漢

申光漢字漢之。由吏曹判書。至正憲大夫議政府左叅贊。兼知成均館事。弘文館藝文館大提學。同知書筵春秋館事。有企齋集。明詩 綜

申光漢庚午會試進士。刻有綱常常變策。嘉靖二十五年。行人王鶴册立朝鮮。國人刻其皇華集。王命光漢為後序。列朝詩集 ○ 廣輿記 光漢舉進士 有綱常常變策 為時傳誦

舊典。使于東國者。必命儒臣給舍。迨嘉靖二十三年。恭僖王薨。遣使賜諡及賻。改命司禮監太監郭璠。副以華亭張行人承憲。於是中官偕行道塗無酬答之作。禮成而返。乃緘詩以寄國人。爰有吏曹判書申光漢。議政府右贊成柳仁淑。成均館司藝朴亨秀。禮曹正郎李洪男。戶曹叅判沈連源。黃海道觀察使權應挺。相與追和之。仍刊為皇華集一卷。而鄭士龍為作序。詩話 靜志居

李希輔



李希輔字和宗。由禮賓寺副正。歷官同知中樞府事。明詩綜

尹仁鏡

尹仁鏡由禮曹判書。改戶曹判書。積官至議政府領議政。同上

林百齡

林百齡官議政府右議政。同上

張行人既使東國。諭祭恭僖王。禮成而返。明年榮靖王復薨。於是別選廷臣。遣長安王鶴。往賜祭及諡。陪臣以詩贈答者。議政府右議政林百齡。禮曹判書尹漑。工曹判書任權。吏曹叅判慎居寬。成均館大司成李潤慶。司藝崔演。承政院右副承旨洪叙濤。奉常寺僉正朴忠元。開城府留守李潔。京畿觀察使宋麒壽。而鄭士龍。尹仁鏡。申瑛。李洪男亦與焉。靜志居詩話

徐敬德

徐敬德朝鮮生員。有花潭集。明詩綜

花潭講學。專以周邵爲宗。詩亦效法擊壤。以金安國引薦。授叅奉力辭。集中酬和者。李相國潔。○又云花潭集有贈朴相國祐。沈相國彥慶。李留守龜齡。金都事洪。林正字蒼。沈教授義。張教授綸。趙上舍玉。沈別提宗元。朴叅奉漑。而朴民獻。頃正。金漢傑。士伸。趙昱。景陽。金惠孫。彥順。以及黃元孫許太輝等。疑皆從遊講學者也。靜志居詩話

洪暹附辛應時 朴淳

洪暹官議政府左贊成。兼知書筵。春秋館事。明詩綜

隆慶元年。以即位頒詔朝鮮。歛縣許公國。南昌魏公時亮。持節以往。是時恭憲王又薨。兩公返命。共成詩一卷。國中屬而和者。止工曹判書朴忠元一人。而洪暹序之曰。小邦不幸。兩公之來。適丁大戚。滿目愁慘。無意於覽物輒題。逐篇和集。亦非有喪者所當爲。所以倡之少。而和之寡也。於此足徵其爲秉禮之國矣。明年衡陽歐希稷。以行人奉使。館伴辛應時。朴淳等。始復有贈送詩焉。靜志居詩話



辛應時官校書館校理。○朴淳官吏曹判書。並明詩綜

朴忠元

遠接使朴忠元慶尙道密陽人。嘉靖辛卯年及第出身。仕工曹判書。號靜

觀齋。許文穆集

魚叔權

護軍魚叔權。家貧祿仕久作卑官。名其所居曰也足窩。同上

李後白 奇大升 李山海

都監官成均館司成李後白。號陽原。○都監官成均館司藝奇大升。號高

峯。○都監官校書館校理李山海。號鵝溪。同上

李珥

李珥德水人。官議政府右贊成。明詩綜○案號栗谷

吾鄉葵陽黃公。按黃公洪憲也以編修使朝鮮。在萬曆十年八月。自珥以下三人。

案三人指栗谷及暨許狀元筭。皆充館伴者也。詩話居金瞻高敬命也。

李克堪 尹子雲 金瞻 高敬命

李克堪官左承旨。○尹子雲官都承旨。○金瞻官吏曹佐郎。○高敬命官

司瞻寺僉正。並明詩綜

柳根 李好閔

柳根字晦夫。壯元。自號隱屏居士。有西壩集。同上

蘭岫諸公。以萬曆丙午使東藩。柳晦夫李孝彥許端甫。為館伴。公携有唱

知詩卷歸。墨蹟今在予家。詩話居

李好閔字孝彥。探花樞相。有五峯書巢集。明詩綜

崔澱

崔澱字彥沉。海州人。進士。有楊浦集。同上

崔澱字彥沉。別號楊浦。高麗海州人。工詩文隸書。祖述東晉草書。逼真懷

素。旁通繪事。善梅竹翎毛。點畫入神。佩文齋書譜

彥沉八齡能詩。年十八中進士。二十二而沒。嘗輕衫幅巾。登鏡浦臺倚柱



而吟。大書于壁曰蓬萊一入三千年。銀海茫茫水清淺。鸞笙今日獨飛來。

碧桃花下無人見。國中疑為真仙。許筠愛而和之。其逝也。李廷龜申欽鄭

協李綏祿趙繼韓具窺韓。先生諱浚謙川皆賦詩以悼。窺詩有云。楊浦烟

花三月酒。匡山風月十年燈。句亦自佳。詩話

李栗谷云。按此詩綜誤以栗谷疑亦指月沙而言彥沉詩似丹穴鳳雛。聲纔出

穴已足驚人。讀之風露爽然。殆非食烟火人語。置之盛唐詩中。亦無媿也。

鄭經世。按號愚伏云。彥沉信口吐詞皆成瓊屑。任叔英。按號疎庵云。彥沉服膺

盛唐。其詩清越俊逸。明詩綜

許筠弟箴 箴

許筠與弟筠。皆舉狀元。箴以弘文館遷臺諫。萬曆壬午為成均館司成。列朝

詩集

筠字端甫。箴之弟。與兄皆舉進士第一。自號白月居士。明詩綜

許筠與二兄箴箴。以文鳴東海。而筠尤敏捷。一覽不忘。詩文皆能闡誦。景

樊其妹也。筠撰朝鮮詩選後序。序見藝文志筠以科名冠冕東國。而慨慕

中華。以不得試于天子之庭為深耻。斯以見東方禮讓之邦。迥出於四裔。

而國家久道化成之盛。亦從可徵矣。列朝詩集

尹根壽

朝鮮使吏曹叅判尹根壽字子固。帶一子名昭。昭已登進士。其父子云。小

邦劇慕汪伯玉。王元美集。即童子皆令授讀。有懷兩先生詩。太平清話○

月汀懷兩先生詩載藝文志

李德馨

吳明濟朝鮮詩選略。萬曆己亥。予自長安復征朝鮮國。館于李氏朝鮮議

政德馨也。雅善詩文。益請搜諸名人集。自新羅至今朝鮮。共百餘家。列朝詩集

李元翼

萬曆二十四年閏八月。封册日本使楊方亨。至沙郎浦。朝鮮差全羅道觀

察使黃慎。同將官朴弘長。隨二使同往。十二月十七日。方亨等。回至陝川。



朝鮮京畿道體察使李元翼先已會黃朴二使備知關白情由不肯休兵。此日請見册使于海印寺。問日本情由。方亨一一備白。元翼欲趨釜營勢寡。急攻破之。惟敬曰虛固當乘動亦宜慎。元翼因其言未敢舉兵。兩朝平壤錄○

按此下平壤錄所謂壬辰諸名臣事實並詳於備禦考故今略錄焉

元均

萬曆二十年倭兵聚于平壤。意欲席捲高麗入犯中朝。行長分遣別將引水兵一枝。由西海直趨全羅。幸得水兵將元均統率水師。扼倭艦於閑山島前洋。奮力齊擊。倭兵棄舟奔還。始不得兼水陸之勢。未敢大逞。二十五年。邢總督未出關。遣咨朝鮮督率諸臣練兵固守地方。把截要險。國王使統制使元均等。以舟師專備竹島加德之賊。各務勉勵以候大兵。行長遣豐茂等領兵襲破元均水兵。遂奪閑山島。上同

李福男

萬曆二十五年八月十二日。行長倭兵至南原城下。楊元與朝鮮全羅兵

馬節度使李福男共守此城。至十六日一更。倭忽擁至南門。猝時登城先開城門。賊遂入城。楊元跳出西門。福男等皆死於城。上同

權慄 李恒福

萬曆丁酉十一月二十九日。邢經略始抵王京。與楊經理麻提督商議動兵。一面哨探倭賊動靜。復面諭本國君臣。示以天朝救援之恩。責以君臣戰守之義。皆感激思奮。督發人馬用心剿賊。於是兵曹判書李恒福與諸道都巡察使權慄。調遣各將屢有斬獲。上同

柳成龍

萬曆丁酉。邢總督未出關。及聞南原之敗。移咨朝鮮國王策勵戰守。國王得咨。董率諸將分守漢江諸灘。又以漢江上流龍津等處。係緊要。發遣京畿都體察使柳成龍。巡歷沿江一帶。檢察守禦形勢。上同

李舜臣

萬曆二十六年。秀吉死。三路倭將皆有歸意。陳璘在海上。聞此喜曰吾等



擊倭收功。此其時矣。令鄧子龍協同朝鮮李統制。引千餘水兵。駕三巨艦。為前鋒。破浪直攻南海。正遇倭船無數。渡海。子龍親率家丁二百餘。齊上高麗舡。衝鋒奮擊。殺賊無數。不期後船用火器失手。反打鄧船蓬檣俱著。倭乘勢登舟。將鄧副將及家丁。皆被死。李統制見鄧將有失。奮勇前救。亦及於難。同上○五鼓隨潮下露梁。陳將軍坐大衝鋒船。揚旗伐鼓直進。會石曼子。方與朝鮮水兵統制使李舜臣兵船交戰。圍舜臣在中。隣合兵助勇。黎明副將鄧子龍。駕舡奔赴。投火毬。將倭船燎焚。燒過倭船七八百賊。奴數十萬。鄧子龍死之。李舜臣亦死之。東征記○竝詳見備禦考

鄭六同

壬辰之役。朝鮮陪臣鄭六同。陷于賊。平義智親信之。六同為我內應。當露梁戰時。急焚火藥。應我軍。賊是以大敗。葉蒼霞集

金應河

經略楊鎬。於己未。按萬曆四十七年也二月十一日。誓師而發。鎬故經略朝鮮者也。鎬以詔旨發其師。光海君命姜弘立為都元帥。金景瑞副之。率師萬三千。銃手居多。鎬命屬於劉綎。命游擊喬一琦。耑督焉。綎一琦皆戰沒。朝鮮裨將金應河。據山為營。嚴銃以拒虜。中銃不退。天乃大風揚塵。銃不能發。應河據胡床。持大弓射賊。力屈而死。弘立與景瑞。舉軍降。武備志

金尙憲

天啓中。朝鮮使臣金尙憲。叔度。按號清陰由登州入貢。鄒平張忠定公館之于家。因刻其朝天錄一卷。詩多佳句。略載於此。詩見藝文志余論詩絕句。淡雲微雨。小姑祠。菊秀蘭衰。八月時。○漁洋集猶子琬注此句。清陰登州次吳秀才詩。而考菊秀蘭衰。作佳菊衰。蘭作記。得朝鮮使臣語。果然。東國解聲詩。漁洋輕雨菊秀蘭衰。作佳菊衰。蘭作記。得朝鮮使臣語。果然。東國解聲詩。漁洋

按清陰詩多載王漁洋感舊集。及孫愷士探風錄中。崇禎末。清陰航海朝京。道出濟南。時張御史延登。罷官家居。清陰得謁。御史一見傾



倒序刻其朝天錄。張御史。即王漁洋先室張氏之祖。故漁洋每表章先生如此之多。英廟丙戌。謝恩使入燕。從行有金在行。養虛清陰傍孫也。遇錢塘嚴誠力闢。潘庭筠香祖。先問貴國知有金尙憲否。遂以實對。潘慷慨久之。贈其篋中所携感舊集一卷。因次清陰韻。臨別贈養虛。先生之風流文采。亦可想見於後世矣。

### 海東釋史卷第六十九終

## 海東釋史卷第七十

人物考 四后妃 名媛 中官

後魏文昭皇后高氏

高麗高颺字法修。高祖初入國。拜厲威將軍。河間子遂納颺女。是爲文昭皇后。生世宗。後魏書

後周德皇后王氏

德皇帝娶樂浪王氏。是爲德皇后。生邵惠公顥。次杞簡公連。次莒莊公洛生。次太祖文皇帝。後周書

按樂浪之王其世遠矣。自漢王仲避地居樂浪。後孫閔景。皆顯名於東漢。遂爲東土大姓。至王波。仕前燕爲太宰。後孫龔。入周爲伏波將軍。是生德皇后。

遼景宗渤海妃

海東釋史七十



景宗渤海妃生一女淑哥。乾亨二年下嫁駙馬都尉盧俊。與俊不諧。表請離昏。改適蕭神奴。遼史

金昭祖次室

昭祖次室高麗人。生胡失答。金史

按金廢帝元妃大氏。渤海人大臬女。廢帝母大氏。大昊天之女。亦渤海人。廢帝宮人高氏。東京渤海人高存福女。皆見於金史。而屬渤海國亡後人。故並不立傳。

元世祖宮人李氏

元世祖時。有李宮人最擅琵琶。揭曼碩袁伯長王繼學。皆為作詩。繼學所謂一曲六么。天上譜者。當屬四絃舊製。楊廉夫元宮詞云。北幸和林幄殿寬。句驪女侍婕妤官。君王自賦昭君曲。勅賜琵琶馬上彈。按鄭麟趾高麗史樂品。琵琶絃五。則婕妤所彈。斯五絃矣。韞光樓雜志

元順帝皇后奇氏

完者忽都皇后奇氏。高麗人。生皇太子愛猷識理達臘。家微用。后貴三世。皆追封王爵。初徽政院使禿滿迭兒進為宮女。主供茗飲。以事順帝。后性穎黠。日見寵幸。後荅納失里皇后。方驕妬。數箠辱之。荅納失里既遇害。帝欲立之。伯顏爭不可。伯顏罷相。沙刺班遂請立為第二皇后。居興聖宮。改徽政院為資政院。后無事。則取女孝經史書。訪問歷代皇后之有賢行者。為法。四方貢獻或有珍味。輒先遣使薦太廟。然後敢食。時帝頗怠於政。后與皇太子遽謀內禪。遣朴不花諭意丞相太平。太平不答。帝亦知后意。怒而疏之。兩月不見。初奇氏之族在高麗者。怙勢驕橫。高麗王怒。盡殺之。二十三年。后謂皇太子曰。汝何不為我復讎耶。遂立高麗王族人留京師者為王。以奇族之子三寶奴為元子。遣同知樞密院事崔帖木兒為丞相。用兵一萬。並招倭兵共往納之。過鴨綠水。伏兵四起。乃大敗。餘十七騎而還。后大慚。二十五年。伯顏忽都皇后崩。中書省臣言。后宜正位中宮。帝不答。十二月。乃授册寶。其册文曰。坤以承乾。元。人道莫先於夫婦。后以母天下。



王化實始於家邦。典禮之常。古今攸重。咨爾肅良合氏。篤生名族。來事朕躬。儆戒相成。每勤於夙夜。恭儉率下。多歷於歲年。既發祥元子於儲闈。復慶孫枝於甲觀。眷若中宮之位。允宜淑配之賢。宗戚大臣。况僉言而敷請。掖庭諸御。咸傾望以推尊。乃屢遜謝。尤可嘉尚。今遣攝太尉某。持節授以玉册玉寶。命爾為皇后。於戲慎修壺政。益勉爾輔佐之心。昭嗣徽音。同保我延洪之福。共欽寵命。以衍壽祺。二十八年。從帝北奔。元史

祁氏按元史作奇性慧黠。有寵於帝。皇后伯吾兒氏。見帝寵祁氏。心不平。之。日夜撞楚祁氏幾不勝。一夕又跪祁氏於前。問其罪。加烙其體。翌日司天奏。昨夕火星犯后妃。初世祖皇帝家法。賤高麗女子。不以入宮。至是始壞祖宗家法。識者知天下之將亂也。○至元元年。立翁吉刺氏為皇后。號正宮皇后。復立祁氏為次皇后。居興聖宮。號興聖宮皇后。二宮並為后。自此始。○至正十八年。時祁宮多蓄高麗美人。大臣有權者。輒以此女送之京師。達官貴人。必得高麗女。然後為名家。高麗婉媚善事人。至則多奪寵。

自至正以來。宮中給事使令。太半為高麗女。以故四方衣服靴帽器物。皆依高麗樣子。此關係一時風氣。豈偶然哉。並庚申外史。元詩選張昱元

腰半臂裁連夜內家爭借看為會着過御前來

劉基巫山高刺奇后作也。庚申君寵高麗奇妃。立以為后。專權植黨濁

亂宮闈。故作巫山高以諷諫焉云。列朝詩集。○又云。劉基楚妃歎梁甫

錄元宮詞。杏臉桃腮。弱柳腰。那知福是禍。根苗高麗。妃子初封。册六月。陰寒大雪。飄奇氏。居新朝。進玉壺。水亭深處。暑全無。君王笑。向奇。三。代。蒙。恩。爵。祿。崇。刺。蘇。○。酒。昨。朝。進。得。高。麗。女。太。半。處。暑。全。無。奇。氏。親。最。苦。女。官。難。散。教。送。作。二。宮。嬪。子。驕。相。襲。好。回。屢。登。庸。弊。古。詩。順。帝。饒。巧。思。良。工。弗。能。及。奇。后。幸。州。人。高。祖。允。肅。官。至。平。章。事。父。子。教。蔭。補。散。員。累。

遷摠部散郎。子敖娶典書李行檢女。生軾轍。轅轡輪。后其季女也。忠惠時順帝遣高龍普朴不花等。贈子敖秉德承化毓慶功臣。封榮安王。諡莊獻。李氏為榮安王夫人。表其門曰貞節。命翰林學士歐陽玄。撰墓碑賜之。後又追封三代為王。軾轍等皆拜為行省參知政事。翰



林學士等官以寵異之。

明太祖妃韓氏

高麗韓氏太祖妃。生女含山公主。洪武二十七年下嫁尹清。明史

按韓氏女之入中國。考之國史家乘。無洪武中選入者。太祖妃韓氏。

未詳何時中選也。惟知淳昌郡事韓永疇二女。俱膺明朝之選。一則

永樂十五年丁酉。譯官元閱生回自京師。奉帝勅。選為太宗麗妃。妃

以麗未詳其義而或是一則宣德三年戊申。欽差昌盛等來。又以帝

高麗人故稱麗妃歟。勅。選為宣宗恭愼夫人是也。名臣錄云。妃兄確年十九。太宗召赴京

師。寵遇殊等。拜光祿少卿。我世宗受禪。確為冊封正使。以帝旨遂

留不還。以副使劉泉復命。後又赴召。欲以仁宗之女尚之。辭以母老

不果。

明太祖碩妃

元制。歲貢高麗貢美女。竊疑明初猶沿元制未改。此孝陵有碩妃。長陵有

權妃也。韞光樓雜志

長陵每自稱曰朕高皇后第四子也。然奉先殿廟制。高后南向。諸妃盡東

列。西序惟碩妃一人。具載南京太常寺志。蓋高后從未懷妊。豈唯長陵。即

懿文太子亦非后生也。疑此事不實。誦沈大理詩。斯明徵矣。○靜志居詩話

志孝陵妃太祖高皇帝高皇后馬氏左一位李淑妃左二位皇妃左三位

皇貴妃左四位皇貴人左五位皇妃左二位皇妃左三位皇妃左四位皇妃左五位

詩綜沈玄華敬禮南都奉先殿紀事徵臣承祀重所生嬪德莫教齊一見

天御幄神所棲衆妃位東序一妃獨在西成祖重所生嬪德莫教齊一見

異千聞實錄安可稽作朱彝尊南京太常寺志跋。海寧談遷孺木棗林雜俎中。述孝慈高皇后

無子。不獨長陵為高麗碩妃所出。而懿文太子及秦晉二王。皆李淑妃

產也。聞者爭以為駭。史局初設。彝尊常以是質諸總裁。前輩謂宜因實

錄之舊。今觀天啓三年南京太常寺志。大書孝陵高皇后主。左配生子

妃五人。右祇碩妃一人。事足徵信。然則實錄出于史臣之曲筆。不足從

也。漢之文帝自言。朕高皇帝側室之子。于義何傷。而奉天靖難記。每載



長陵上闕下書。及宣諭臣民曰。朕太祖高皇帝孝慈高皇后嫡子。考妣必並舉壺漿。欲掩而跡反露矣。志凡四十卷。嘉善沈若霖編。曝書亭集

乾學按實錄及諸野史。皆謂懿文太子秦晉二王及文皇帝。為高皇后所生。獨南京太常志云。碩妃生文皇帝。嘗熟錢先生謙益。興化李先生清。曾入寢廟審視其位次。果如志所云。然則實錄其未足盡信歟。讀禮通考

按字彙補。碩姓。太常寺志。明祖妃碩氏。集韻音公 盜葉記曰。歷考萬姓統譜。及我國氏族諸書。元無碩字姓。近世羅杰入燕。見博明問碩妃事。明曰。即故元元妃。見明太常志云。明蒙古人。元世祖之後也。官主事。博學多著。輯工書。有曰。故元元妃者。亦有所據。蓋庚申君時與奇氏同入。元亡後。為太祖之妃。而國史諱之。或是貢姓。而加以石傍歟。

明成祖權妃

成祖朝權妃者。朝鮮人。永樂七年五月。朝鮮貢女充掖庭。妃隨衆女入。上

見妃色白而質復穠粹。問其技。出所攜玉琯吹之。窈眇多遠音。上大悅。驟拔妃出衆女上。逾月册賢妃。授妃父永均。按永均即權妃兄。為光祿卿。八年十月。妃侍上北征。凱還而疾。至臨城曰。不能復侍上矣。遂薨。上哀悼親賜祭。諡曰恭獻。命厝其柩于澤縣。勅縣官守之。其後永均以宣德一作洪熙中卒。訃聞上仰推先澤。遣中官賜祭。其家白金二十兩。文帛表裡有差。勝朝拾遺記。亦同。

永樂間。上寵幸高麗賢妃權氏。穠粹善吹簫。宮中爭效之。故臞仙按寧獻王權

宮詞。有天外玉簫及美人學玉簫之句。王司綵宮詞亦云。玉簫嘹唳月明

中。皆紀實也。列朝詩集。寧獻王宮詞。忽聞天外玉簫聲。花下聽來獨自

中。皆紀實也。行三十六宮。秋一色不知何處月。偏明鮎魚窓。冷夜迢迢。靜

移入大明宮。一樹凝香倚晚風。贏得君王留步。輦玉簫。嘹唳月明中。○瑤花

志居詩。玉簫嘹唳月明中。皆為權妃作。

任順妃 李昭儀 呂婕妤 崔美人  
永樂中。權貴妃。任順妃。李婕妤。崔美人。皆朝鮮所貢女。權妃父光祿卿永



均任妃父鴻臚卿添年。李昭儀父光祿小卿文。按文命之誤呂婕妤父光祿小卿貴真。崔美人父鴻臚少卿得霏。記作得霖誤皆朝鮮人也。雖貴至列卿而尚居朝鮮。至宣德中。永均以訃聞。賜白金米布。兪州別集○太平清話任氏昭儀李氏婕妤好呂氏美人崔氏皆高麗人。時尚襲元制。高麗貢美女。永樂庚寅詔止貢女。不復至。聖政之不邇聲色如此。○形管拾遺記時朝。鮮所貢美女四人。皆命其父為京朝官。呂

按魚氏紀年。永樂六年。帝遣太監黃儼。選女子以進。工曹典書權執中女。仁寧府左司尹任添年女。恭安府判官李文命女。侍衛司中領護軍呂貴真女。中軍副司正崔得霏女。預選。七年光祿卿權永均赴京。永均權妃兄也。十二年甲午。譯官元閔生於櫻殿內。欽奉聖諭。自皇后崩逝後。令汝國權妃管六宮事。汝國呂氏請於高麗內官金得金良。借砥礪於銀匠。和糊都茶。以與權妃毒死。朕已殺內官銀匠。又用烙鐵烙呂氏一箇月殺了。爾說與權永均知道。洪熙元年。遣尙寶監少監金滿。賜權氏兄永均。宣德四年。又遣金滿。賜祭崔氏父得霏。

永均乃權妃兄。而兪州及朱氏毛氏皆不知。又以李文命為李文。皆誤也。

又按本國女子之選入中國者。今附見于此。永樂七年八月。帝遣太監黃儼奉勅。選知宜州事鄭允厚女以送。十五年丁酉。元閔生自京回。奉聖諭。選宗簿副令黃河信女。與韓永疇女。同黃儼等送進。宣德二年丁未。以帝勅。選工曹判書成達生女。右軍同知摠制車指南女。右軍司正吳倜女。右軍司正安復志女。侍衛司右領護軍鄭孝忠女。中軍副司正崔瀾女。左軍司直盧從得女。同欽差昌盛等送進。三年戊申。以帝勅。又選韓永疇女。同昌盛等送進。此皆我國女子入中國之大畧也。

又按僊說云。女子入中國。而尊貴者。如奇皇后。權妃。韓妃之類。人皆知之。如明宣宗吳皇后。鮮有識者。吳氏鎮川人。按考事撮要。宣德二年。選右軍司正吳倜女以進。當是此人也。妃為後宮生景泰。後景泰



尊為太后。后思念本土。以畫像歸之東國。既無以處也。乃置之僧舍。樵牧侮玩。至今尚存。續通考云。母丹徒人。都督吳彥名女。然影還本國。真有其事。豈可誣者耶。

右后妃

麗玉 麗容

箜篌引。朝鮮津卒霍里子高妻麗玉所作也。以其聲傳隣女麗容。○古今注

樂事詳志

後魏馮郎妻王氏

樂浪王氏。適秦雍二州刺史西城郡公馮郎。生文明皇后。○後魏書

薛瑤

薛瑤。東明國人。左武衛將軍承冲之女。年十五。剪髮出家。十六年為謠。見

藝文志

遂返初服。嫁郭元振為妾。○全唐詩

陳子昂郭公姬薛氏墓誌銘。姬人姓薛氏。東明國王金氏之胤也。昔金

王有愛子。別食於薛。因為姓焉。世不與金氏為姻。其高曾皆金玉貴臣大人也。父承冲。有唐高宗時。與金仁問歸國。帝疇厥庸。拜左武衛將軍。姬人幼有玉色。發於穠華。若彩雲朝升。微月宵暎也。故家人美之。少號仙子。聞羸臺有孔雀鳳凰之事。瑤情悅之。年十五。大將軍薨。遂剪髮出家。將學金仙之道。而見寶手菩薩觀心六年。青蓮不至。乃作謠。遂返初服。而歸我郭公。郭公豪蕩而好奇者也。雜珮以迎之。寶琴以友之。其相得如青鳥翡翠之婉變矣。華繁艷歇。樂極悲來。以長壽二年太歲癸巳二月十七日。遇疾卒於通泉縣之官舍。嗚呼哀哉。郭公恍然猶若未亡也。寶珠以含之。錦衾而舉之。故國途遙。言歸未迨。留殯於縣之惠普寺之南園。不亡貞也。銘曰。高邱之白雲兮。願一見之何期。哀淑人之永逝。感之春時。願作青鳥長比翼。魂魄來兮遊故國。○唐文粹

按東明。即夫餘之始祖。而誤指為新羅也。金是羅王之姓也。薛亦新之大姓也。唐武德四年。新羅人薛尉頭。隨海舶入唐。至太宗時。拜左



武衛果毅。及征高麗。力戰死於駐驛山下。太宗脫御衣覆屍。授職大將軍。金仁問。新羅武烈王第二子也。年二十三入唐。高宗時。挾唐師共征百濟。後官至柱國。死於唐。子昂。所謂薛承冲。余以爲新羅人。薛爾頭。改名承冲也。然則武衛之拜於高宗者。非也。既曰與金仁問歸國。則仁問之入唐。或在於太宗之時歟。又曰帝疇厥庸。則爾頭從征有功。故帝嘉之也。其所謂帝者。余以爲太宗也。考貞觀十九年乙巳。薛將軍死之。其時姬年十五。則姬辛卯生。是薛將軍歸唐十年。始生斯女也。

元孛羅帖木兒妻高麗氏

高麗氏。宣慰副使孛羅帖木兒妻也。至正二十七年。其夫死於兵。乃以火自焚死。元史

朶里不花妾高麗氏

朶里不花。拜江西行省叅政。土寇金榮作亂。不花死。其妻卜顏氏。妾高麗

氏在側不去。皆大罵曰。我平章遇爾父子至厚。何暴逆至此。皆遇害。續文獻通考

濶濶歹側室高麗氏

平章濶濶歹之側室高麗氏。有賢行。平章死。誓弗貳適。正室子拜馬朶兒赤。悅其色。欲妻之。而不可得。乃以其父所有太蒼納環子。獻于太師伯顏。伯顏特爲奏聞。奉旨命拜馬朶兒赤。收繼小母高麗氏。高麗氏夜與親母踰垣而出。削髮爲尼。同上

李淑卿

朝鮮鐵原李淑卿。歸梁文學。無何梁文學應試漢京。遂及第。擢弘文館不還。淑卿懷之鬱抑而死。聞者悲而哀之。列朝詩集○按廣輿記亦載李淑卿事

李淑媛

李淑媛。自號玉峯主人。朝鮮學士趙瑗之妾。遭倭亂死之。宮閨小名錄室○也裔



趙媛官學士承旨。死倭亂。妾李氏自號玉峯主人。詩如兩兩鷓鴣失舊磯。  
啣魚飛入菰蒲去。亦佳句也。詩話

壬辰倭陷王京。宮眷南轅。宦族盡遭魚肉。婦人死節者甚衆。承旨學

士趙媛妾李氏亦死之。李善詩。美而無子。自號玉峰主人。與許妹翰墨交

甚密。今存詩四首。兩朝平壤錄。○按四首即贈郎自適秋思七夕四絕句也。

許妹氏

許景樊字蘭雪。朝鮮人。其兄筇筠皆狀元。八歲作廣寒宮玉樓上樛文。才  
名出二兄之右。適進士金成立。不見答于其夫。金殉國難。許遂爲女道士。  
金陵朱狀元。奉使東國。得其集以歸。遂盛傳于中夏。柳如是曰許妹氏詩。  
散華落藻。膾炙人口。然吾觀其遊仙曲。不過邀取小茅君。便是人間一萬  
年。曹唐之詞也。楊柳枝詞。不解迎人解送人。裴說之詞也。宮詞。地衣簾額  
一時新。全用王建之句。當時曾笑他人到。豈識今朝自入來。直鈔王涯之  
語。絳羅襖裏建溪茶。侍女封緘結綵花。斜押紫泥書勅字。內官分賜五侯

家。則撮合王仲初黃金合裏盛紅雲。與王歧公內庫新函進御茶兩詩而  
錯直出之。間回翠首依簾立。閒對君王說隴西。則又偷用仲初數對君王  
憶隴山之語也。次孫內翰北里韻。新粧滿面頻看鏡。殘夢關心懶下樓。則  
元人張光弼無題警句也。吳子魚朝鮮詩選云。遊仙曲三百首。余得其手  
書八十一首。今所傳者。多沿襲唐人舊句。而本朝馬浩瀾遊仙詞。見西湖  
志。餘者亦竄入其中。凡塞上楊柳枝竹枝等舊題皆然。豈中華編什流傳  
鷄林。彼中以爲琅函秘冊。非人世所經見。遂欲掩而有之耶。此邦文士。搜  
奇獵異。徒見出于外夷女子。驚喜譖歎。不復覈其從來。桐城方夫人。採輯  
詩史。評徐媛之詩。以好名無學四字。遍誚吳中之士女。於許妹之詩。亦復  
漫無簡括。不知其何說也。承夫子之命。讎校香奩諸什。偶有管窺。輒加槩  
記。今所撰錄。亦据朝鮮詩選。存其什之二三。其中字句竄竊觸類而求之。  
固未可悉數也。觀者詳之。詩集

按蘭雪許氏。草堂擘之女。荷谷筇之弟。適正字金誠立。金初無殉國



難之事。許以二十七歲。先金早逝。豈有為女道士之理。

許妹。狀元許筠妹也。七歲能詩。國號女神童。適進士金誠立。按成立之訛

壬辰誠立死于倭。妹守節不二。自號蘭雪主人。遊仙曲百首。今存其四首。

及宮詞二首。兩朝平壤錄

陳臥子云。許氏學李氏而合作。有盛唐之風。外藩女子能爾。可見本朝文

教之遠。詩話明。閨秀詩類多偽作。轉相附會。久假不歸節。吾於許景樊之

詩。見其篇章句法。宛然嘉靖七子之體裁。未應風教之訖符合如是。不能

無質鼎之疑也。朝時綜

朝鮮女郎許景樊。八歲作廣寒殿玉樓上樑文。惜未見其文。戲筆補之。西堂

祖雜

按玉樓上樑文。載蘭雪本集中。亦膾炙本國。今錄于左。文曰。述夫寶

蓋懸空。雲駟超色相之界。銀樓耀日。霞楹出迷塵之壺。雖復仙螺運

機。幻作壁瓦之殿。翠蜃吹霧。噓成玉樹之宮。青城丈人。玉帳之術斯

殫。碧海王子。金櫃之方畢施。自天作之。非人力也。主人名編瑤籍。職

綴瓊班。乘龍太清。朝發蓬萊。暮宿方丈。駕鶴三島。左挹浮邱。右拍洪

厓。千年玄圃之接遲。一夢人間之塵土。黃庭誤讀。謫下無央之宮。赤

繩結緣。悔入有窮之屋。壺中靈藥。纔下指於玄砂。脚底銀蟾。遽逃形

於桂宇。笑脫紅埃。赤日重披。紫府丹霞。鸞笙鳳管之神遊。喜續舊會。

錦幙銀屏之嬌宿。悔過今宵。胡為日宮之恩綸。俾掌月殿之賤奏。官

曹清切。足踐八霞之司。地望崇高。名壓五雲之閣。寒生玉斧。樹下之

吳質無眠。樂奏霓裳。欄邊之素娥呈舞。玲瓏霞佩。振霞錦於仙衣。熠

耀星冠。點星珠於人勝。仍思列仙之來會。尚乏上界之樓居。青鸞引

玉妃之車。羽葆前路。白虎駕朝元之使。金縷後塵。劉安轉經。拔雙龍

於案上。姬滿逐日。駐八風於山阿。宵迎上元。綠髮散三角之髻。晝接

帝女。金梭織九紋之綃。瑤池衆真會南峰。玉京羣帝集北斗。唐宗踏

公遠之杖。得羽衣於三章。水帝對火仙之碁。賭寰宇於一局。不有紅



樓之高構。何安絳節之來朝。於是移章十洲。馳檄九海。囚匠星於屋底。木宿掄材。壓鐵山於楹間。金精動色。坤靈揮鑿。聘巧思於般倕。大冶鎔爐。運奇智於鍾範。青緞垂尾。雙虹飲星宿之河。赤霓昂頭。六鰲戴蓬萊之島。璇題燭日。出彤閣於烟中。綺綴流星。架翠廊於雲表。魚緝鱗於玉瓦。雁列齒於瑤階。微連捧旗。下月節於重霧。鳧伯樹蠹。設蘭幄於三辰。金繩結綺戶之流蘇。珠網護雕欄之阿閣。仙人在棟。氣吹彩鳳之香臺。玉女臨窓。水溢雙鸞之鏡匣。翡翠簾雲。母屏青玉案。瑞靄宵凝。芙蓉帳孔雀扇白銀床。祥蛻晝鎖。爰設鳳儀之宴。俾展燕賀之誠。傍招百靈。廣延千聖。邀王母於北海。斑麟踏花。接老子於西關。青牛臥草。瑤軒張錦紋之幕。寶簷低霞色之帷。獻蜜蜂王。紛飛炊玉之室。含果雁帝。出入薦瓊之厨。雙成鈿管。晏香銀箏。合鈞天之雅曲。婉華清歌。飛瓊巧舞。雜駭空之靈音。龍頭瀉鳳髓之醪。鶴背捧麟脯之饌。琳筵玉席。光搖九枝之燈。碧藕冰桃。盤盛八海之影。獨恨瓊

楣之乏句。繫致上仙之興嗟。清平進詞。太白醉鯨背之已久。玉臺搗藻。長吉笑虵神之太多。新宮勒銘。山玄卿之雕琢。上界鐫璧。蔡真人之寂寥。自慙三生之墮塵。誤登九皇之辟剎。江郎才盡。夢退五色之花。梁客詩催。鉢徹三聲之響。徐援彤管。笑展紅牋。河懸泉湧。不必覆子安之衾。句麗文道。未應頽謫仙之面。立進錦囊之神語。留作瑤宮之盛觀。置諸雙樑。資於六偉。拋樑東。曉騎仙鳳入珠宮。平明日出扶桑底。萬縷丹霞射海紅。拋樑南。玉龍無事飲珠潭。銀床睡起花陰午。笑喚瑤妃脫碧衫。拋樑西。碧花零露彩鸞啼。春羅玉字邀王母。鶴馭催歸日已低。拋樑北。溟海茫茫侵斗極。鵬翼擊天風力掀。九霄雲垂雨氣黑。拋樑上。曙色微明雲錦帳。仙夢初回白玉床。臥聞北斗回杓響。拋樑下。八垓雲黑知昏夜。侍兒報道水晶寒。曉霜已結鴛鴦瓦。伏願上樑之後。琪花不老。瑤草長春。曦舒凋光。御鸞輿而猶戲。陸海變色。駕鸞輪而尙存。銀窓壓霞。下視九萬里。依微世界。璧戶臨海。笑看



三千年清淺桑田。手回三霄日星。身遊九天風露。

右名媛

宦者朴不花

朴不花高麗人。亦曰王不花。皇后奇氏。微時與不花同鄉里。相為依倚。及選為宮人有寵。遂為第二皇后。於是不花以闈人入事皇后者有年。皇后愛幸之。情意甚膠固。累遷官至榮祿大夫資正院使。資正院者。皇后財賦悉隸焉。又為集賢大學士崇正院使。皇后之力也。後與李羅帖木兒有隙。為所殺。元史〇元史本傳今畧錄焉。〇周憲王誠齋新錄元宮詞興聖宮中侍太皇十三初到捧爐香如今白髮成衰老四十年如一夢場。

禿滿反兒。按元史皇后傳禿滿送兒

元統元年六月。徽政院使宦者高麗人禿滿反兒者。首薦高麗女子祁氏

案當作於帝外史

鄭同 崔安

成化四年十二月。上遣太監鄭同崔安。冊封朝鮮 世子我睿宗御諱為王。既

行。巡按遼東監察御史侯英奏。同與安俱朝鮮人。墳墓宗族皆在其地。於其國王。未免行跪拜之禮。進囑托之辭。殊輕中國之體。乞追寢成命。遣翰林院給事中。及行人往使為便。上是其言。於是賚賞則遣內臣。冊封則遣廷臣有學行者。憲宗實錄

洪光寺建自鄭常侍同。同生高麗。其國 王按我世宗時貢入中國得侍宣宗。

後復使高麗至金剛山。見千佛繞毗盧之式。歸結圓殿供毗盧。表裏千佛

面背相向。自為碑文自書之。帝京景物志。鄭同重修同朝遊業。洪光寺亦古刹。巨寶蓮皆極工巧。臺石有姜立綱書碑。〇李旻碑曰。自香山西行數百步。至洪光寺。圓殿極工。成化初。勅於中官。高麗人見其國。金剛山有圓殿。故移其製於此。〇春明餘錄。洪光寺在香山。宣德中。內侍鄭同建。高麗人傲其國。毘盧殿之制作。圓殿供毘盧。門內公徑作盤。最為幽勝。寺碑石自撰。

按攷事撮要。永樂元年癸未十一月。聖旨選進乾淨的俊的火者。即選羅邁等三十五名送進。三年乙酉。禮部咨選精細中用的火者來用。即選尹鳳等八名送進。宣德三年戊申。勅會割肉的火者。二名送



進。四年己酉五月。遣內官昌盛尹鳳。選火者。景泰七年丙子。遣內官尹鳳金逸。選小火者以進。即以火者上佐等九人送進。撮要所載。火者之選凡五次。又按鄭同之來凡四次。成化五年己丑。帝遣太監鄭同。賜祭諡及賻。十六年庚子。遣鄭同賜白金紋綺。十七年辛丑。遣鄭同賜册封。繼妃誥命。十九年癸卯。遣鄭同勅封。世子同病卒。候英之奏可謂得體矣。然英奏後。辛丑癸卯兩次册封。俱係鄭同。則英言未必踐也。

張欽

嘉靖三年七月。上以司禮監張欽。有贊襄功。廢弟侄一人。為錦衣衛指揮同知世襲。欽朝鮮人。無族屬。以家人李賢承襲。兪州集右中官

### 海東釋史卷第七十終

## 本會役員

名譽贊成員	會禰荒助	松井茂
舊韓國統監子爵 故	大久保春野	小宮三保松
朝鮮駐劄軍司令官陸軍大將男爵	宇佐川一正	荒井賢太郎
東洋拓殖會社總裁男爵	金允植	木內重四郎
朝鮮中樞院副議長從一品勳一等	朴齊純	俞吉濬
舊韓國內部大臣	趙重應	
舊韓國農商工部大臣		
特別贊成員	石塚英藏	井上雅二
朝鮮總督府取調局長官	岡喜七郎	河合弘民
舊韓國內部次官統監府參與官	若林資藏	大岡力
舊韓國警視總監	俵孫一	小田省吾
朝鮮總督府土地調查局副總裁	倉富勇三郎	黑崎美智雄
司法部長官		前間恭作
舊韓國內部警務局長統監府參與		
舊韓國宮內府次官統監府參與官		
總督府度支部長官		
總督府農商工部長官		
前漢城府民會長		
本會評議員		
舊韓國宮內府書記官		
舊韓國宮內府奎章閣囑托		
東洋專門學校京城分校幹事文學士		
前京城日報社長		
學部書記官文學士		
舊韓國宮內府奎章閣圖書課長		
總督府文書課長		



總督府人事局長

國分象太郎

高審法院判事法學士

淺見倫太郎

鮎貝房之進

菊地謙讓

京城控訴院部長法學士

三宅長策

東洋拓殖會社秘書長法學士

嶺八郎

本會主幹 朝鮮雜誌社長

釋尾春菴

句讀者

杉山孝敏

朴齊翊

# 朝鮮古書刊行會

明治四十四年八月廿七日印刷  
明治四十四年八月三十日發行

會員豫約費一册參圓五十錢  
會員外一册賣價五圓

朝鮮京城旭町一丁目百六十四番地

朝鮮古書刊行會代表者  
編輯兼發行者

釋尾春菴

京城明治町三丁目日韓印刷株式會社內

印刷者 山口竹二郎

朝鮮京城旭町壹丁目朝鮮雜誌社

發行所 朝鮮古書刊行會

電話一千二百五十番  
振替口座京城一三一番

京城明治町三丁目

印刷所 日韓印刷株式會社

朝鮮京城本町二丁目

豫約並發賣取次店 日韓書房

東京神田表神保町

豫約並發賣取次店 同文館











